

JOHN OTOHU TA EVANERIA

Ke na bisi ena.

¹ Enda irae kitit be kiti ta amo Ke ra eto ke amo God ga mitiaetija. Eto Ke amo God ra.

² Eto Ke amina God ga daroho mitiaetija.

³ Eto Ke amina God na donda tapa ena. Eto donda tapa amo eonga irerembae rate Ke amina enu irerembena.

⁴ Eto Ke amita degi vasiri daroho mitiaetija eto vasiri amina enu embo ta degi usasa puvuna

⁵ Eto usasa amina mume ta pangena te mume amina usasa nembari inono aera.

⁶⁻⁷ Eto embo vahai javo John amo usasa ta ke avo harikau embomeni ingito ke be ara God na ikenu puvuna.

⁸ Eto embo John amo usasa mane rate usasa avo embo ta degi harikaja ikenu puvuna.

⁹ Eto Ke amo usasa be embo usasa ta irora enda ta puvuna.

¹⁰ Eto enda ta puvuna amita ingen na hajire ikari aita puvuna te embo na kito kiaesira ea.

¹¹ Eto tohota da be amina kogombena ai ta puvuna te amita embomeni na kito peketo umbae ea.

¹² Rate embo nei nei amuna kito peketo ke be ijio amita degi sovera ari ikenu umbuto God ta meniundi be ea.

¹³ Amo enda ta meniundi mane bisi ta uje ta meniundi mane eto embo ta be ikari ta meniundi mane rate amo God ta meniundi be amina umo eonga iharira.

14 Eto ke amina puvuto besi umbuto dagote mitiaetei amita usasa avo kia, Mamo ta Meni avoeto amita usasa amo ke be te hondate ari te na enetarira.

15 Eto John na amita ke avo einge hande ena, “Embo nau ambota puvuresuja, ainge eona amo nau aja na na ingae iji te kiti ta mitouva avoeto embo amo peni ra eto na isapara. Eto embo amo puvija erevira,” ainge John na ena.

16 Eto Iesu Keriso amo hondate ari embo avoeto hondate ari hamota hamota eto umbuora

17 Eto ke pepeni Moses ta eto puvurari rate ke be te hondate ari te amo Iesu Keriso ta degi eto umbuora.

18 Embo na God manę kiora te God ta Meni avo vahai God ga inono amina eoi God kiora.

John na Iesu harikena

(Matthew 3:1-12, Mark 1:1-8, Luke 3:1-18)

19 Eto Judea ta embo okokose da Jerusalem ta mitia amina priests te ke pepeni kiari embopo te ainge eto ikeo John ta degi pambuto, “Umo embo amunure?” ainge eo

20 John na ke mine ondikae hariketo einge ena, “Ungo Keriso simba ere ovova na avo manera,” ainge enu

21 ehako “Umo Elijah rete?” ainge eo “Na avo manera” ainge enu, “Umo peroveta simba ereovora aravorete?” “Na avo manera.” ainge enu

22 “Eto nango iketere puvera embopo ta degi pambuto ke do aro? Eto umo amunure eto embo umo ke do eoe?” ainge eo.

²³ Eto peroveta Isaiah na ke matu kajena avo John na umbuto einge ena, “Embo ojagatambu ta mitie jage eto ke einge aisuja, ‘Bada ta puvurari degi evu tambu ai’ ainge ena embo amo namora,” ainge enu

²⁴ Pharisee embomeni nei nei Jerusalem eto puvua amina John ganoka eto

²⁵ einge ea, “Umo Keriso mane, eto Elijah mane eto Peroveta simba ereovora avo manera te do eto embomeni bapataito ere oe?” ainge eo,

²⁶ John na ke mine einge ena, “Na umo na bapataito ere ona te embo vahai amo ungota orohuta heteto mitia amita duru avo ungo matu ingae ra te

²⁷ nau ambota puvuto ere hua amita utu goru nanena aruseto houkari inono aera.” ainge ena.

²⁸ Eto John na umo Jordan ta ovitiho da Bethany ta embomeni bapataitounu ari erevi ea.

²⁹ Eto iji nei Iesu na John ta degi puvutohunu kito ke einge ena, “Kivu. God ta o ‘sheep’ meni embo ta ari sasapura ombuto umbasi puvuto ere hua.

³⁰ Na embo erevi avoeto ke einge ijiena. ‘Eto embo nau ambota puvuresuja amo na irae iji te mitiaetija avoeto na isapa eto embo amo penira’ ainge ijiena

³¹ eto namote tapa embo amo matu na kiae rate Israel embomeni ta degi harikasi puvuto umo na bapataito ereona.” ainge eto,

³² Ke nei einge harikena, “Ahiji Otohu di dipo ainge Utu i ta eto amita degi puvei kena,

³³ Eto embo amo mane kiaetenate na embo bapataito ana ikari Embo emina nau degi ta kitii

ke einge ijija. ‘Eto embo amuta degi Ahihi Otohu beto iresuja embo amina embomeni Ahihi Otohu na bapataito aisuja.’ ainge etei ingito

³⁴ ari avo kito embo erevi God ta Meni be avoeto ungota degi ere harikitona.” ainge John na ena.

Iesu na amita ambotani siriketo umbuna.

³⁵ Eto evito iji nei John te ambotani heriso te aingeto degi ai ta heteto mitio

³⁶ Iesu puvuto pahunu John na kon eto kito ke einge ena, “Kivu, God ta o ‘sheep’ Meni ra,” ainge enu

³⁷ John ta ambotani heriso amina ingito Iesu ambo ambo ue pahuo,

³⁸ Iesu na overeketo kito ke einge ena, “Ungo amunami uje ere ove,” ainge enu enana na, “Ate poekari embo, umo nainge irioe?” ainge eo

³⁹ Iesu na “Huma kivujo.” Ke ainge enu enana ture 4:00 o’clock ainge amiga pambuto amita irari degi kito amiga mitio ture bena

⁴⁰ Enana heriso John ta ke ingito Iesu ambo ambo ea vahai amo Simon Peter ta eambo Andrew ra.

⁴¹ Eto iho bujenu Andrew na amita namei tambuto ke einge ena. “Israel embo ta hondate ari embo Keriso avo tambera.” ainge eto

⁴² Simon umbuto Iesu ta degi pambuo Iesu na Simon kon kon eto kito ke einge ena, “Umo John ta meni Simon rate nanena no javo ere ikitena amo ‘Cephas’ ra. (‘Cephas’ ta be amo Atara ra.)” ainge Iesu na ena.

Iesu na embo Philip te Nathanael te umbunu ambo ambo ea

43 Eto iji nei Iesu na enda Galilee ta pambasi ue embo Philip tambuto, “Na ambo ambo ejo.” ainge ena.

44 Eto Philip amo Andrew te Peter te amita da vahai Bethsaida avo embora.

45 Eto Philip na embo Nathanael tambuto ke einge ena, “Eto Moses te peroveta te aingeto enana ta ke kaitie embo vahai puvuresuja ainge ijie kajea avo tambera amo da Nazareth embo Joseph amita meni Iesu avo tambera,” ainge enu,

46 Nathanael na, “Da Nazareth amo sapura rate do eto ari javotoho amo puvurou?” ainge enu Philip na, “Huma, ki.” ainge enu Iesu ta degi pahuo.

47 Iesu na Nathanael puvuto ere hua avo kito ke einge ena, “Embo puvuto ere hua amo Israel embo be ra eto amita ke sokova irae.” ainge enu,

48 Nathanael na ingito, “Ate poekari embo umo nainge eto na kiarire?” ainge enu Iesu na einge ena, “Eto Philip na umo jage ae kiti ta umo i junga susu utumota mite kena,” ainge enu,

49 Nathanael na ke einge ena, “Ate Poekari Embo, umo God ta Meni be Israel embo ta King ra.” ainge enu,

50 Iesu na, “Nanena umo i junga susu utumota mite kena avo etene ingea avoeto na ke be ijie amomo erete? Eto avo pere mane rate ari sovera neite neite kesoa,” ainge,

51 eto ke nei enana ta degi einge ena, “Na ungota degi ke be na erena, Utu pe hirikau God ta anera na Embo ta Meni ta degi bearako bitarako, ainge ue pahurou kesova.” ainge ena.

2*Da Capernaum ta jimbari pondo ea*

¹ Eto iji three amita ambota da Cana enda Galilee amita jo ta jimbari ta pondo asi uo Iesu ta e na pondo ta pambuna.

² Eto Iesu te amita ambotani te avo oru eo pambuto mitio,

³ pondo ta ‘wine’ avo embomeni na indio irae enu Iesu ta e na meni ta degi puvuto, “Wine irae etija.” ainge enu,

⁴ Iesu na, “Pamone, umo do eto nau degi ta ke ere? Nau pure ari iji puvuraera,” ainge enu,

⁵ amita e na pondo simba ari embopo ta degi ke einge ena, “Ungo amita ke tapa do aisuja avo agi evu,” ainge ena.

⁶ Eto Judea ta utu te ingeni te egerekari ovu pepeni tapa 7 atara na ari amo teka 100 litres vahai vahai ainge mitinu,

⁷ Iesu na kito pondo simba ari embopo ta degi ke einge ena, “Ovu pepeni ei ta umo overekevu pevitore,” ainge enu umo timbuto ovu jo ta overekeo pe inono enu,

⁸ Iesu na, “Umo avo timbuto umbuto pambuto pondo mamo ta ikevu,” ainge enu,

⁹ umo avo timbuto pambuto pondo mamo ta ikeo umo amo ‘wine’ enu umbuto indina. Eto ‘wine’ amo nainge eto puvuna amo pure embopo na kia te pondo mamo na kiae avoeto pambuto jimbari singa ta degi ke einge ena,

¹⁰ “Pondo iji te amo ‘wine’ javotoho avo kiti indiore inono eoi ambota ‘wine’ sapura amo

indiora te inena ‘wine’ javotoho ambota ikete ere indera erekira.” ainge ena.

¹¹ Eto ari emo Iesu ta vasiri te sovera te amo itikari ta da Cana enda Galilee jo ta ena. Eto ari aravo Iesu na harikenu amita ambotani na Iesu ta sovera do aingere avo kito ke be ea.

¹² Eto amita ambota Iesu na amita e te namei kamei te ga da Capernaum ta pambuto iji heriso mitia.

Iesu na Temple jo ta embo kurumbena.

(Matthew 21:12-13, Mark 11:15-17, Luke 19:45-46)

¹³ Eto Judea ta jarukari pondo auvitinu Iesu na da Jerusalem ta pambuto

¹⁴ temple jo ta toreto embo na o ‘cow’ te o ‘sheep’ te di dipo te aingeto pure ari gaga ta tetembeto koro na mine ombo ue mitio puvuto kito,

¹⁵ esi era erari amina ena amina umbuto kurumbenu o ‘cow’ te o ‘sheep’ te tapa joru temple toto pahuo koro ombari embopo ta koro avo teto osirikenu enda ta benu gaga jigito haperekenu,

¹⁶ di dipo ombari embopo ta degi ke einge ena, “Donda erekira tapa umbavu pambai. Nau Mama ta bande erekira ungo na mine ombuto umbari bande mane aisova.” Ainge enu,

¹⁷ Iesu ta ambotani na ke matu kajari avo hotembea, ke amo erekira, “Na no bande osa asona amina jo nau enetasuja.”

¹⁸ Eto Judea embomeni na taekasi ke einge ea, “Umo embo amuta sovera na ke agi ue embo ere kurumbite, avo amita hajire ejo kiore.” Ainge eo,

¹⁹ Iesu na ke mine einge ena, “Aravorate erevi aisona, temple erevi aimbavo nanena iji 3 ehako jigono erasuja.” ainge enu,

²⁰ Judea embomeni na ke einge ea, “Temple erevi gerikitiore jua tapa 46 irae ere ova te inena iji 3 amita jo ta gerikaote?”

²¹ ainge ea te Iesu na amita hamo avo temple ke ena.

²² Eto Iesu na ambuto vasiri te erasuja amita ke te tapa ena avo ambotani na hotembeto God ta ke kajari amite tapa ke be ea.

Iesu na embo ta jo ta hotembari avo kina

²³ Eto Iesu na jarukari pondo iji te da Jerusalem ta mitie ari neite neite unu embo isapamane na kito Iesu ta javo ke be ea.

²⁴ rate Iesu na embo ta jo matu kina avoeto tumota be ae.

²⁵ Eto Iesu na embo ta jo ta hotembari do aingere amo embo nei ta degi eto ingaera amita be amo umo matu ere kogua avoeto.

3

Iesu na embo Nicodemus ga ke mine ara ea.

¹ Eto Pharisee ari embo vahai Judea ta embo okose javo Nicodemus

² amina mumete puvuto Iesu ta degi ke einge ena, “Ate Poekari Embo, umo ari neite neite ere oa amo embo na eonga mane aetera te God na hondate uei eoa avo eto umo ate poekari embo God na ikenu puvura.” ainge enu,

³ Iesu na ke einge ena, “Na no degi ta ke be erena, embo God na au e na eha ingarako aisuja,

te ainge ae amo God ta titi jigari degi amo mane kesuja.” ainge enu,

⁴ Nicodemus na ke mine einge ena, “Embo peni amo amita e na naingeto ingau? Amo e ta oti ta ehako torau ingaute?” ainge enu,

⁵ Iesu na einge ena, “Eto embo na umo te Ahihi te na e ta oti ta eha bearako aisuja te ainge ae amo God ta titi jigari degi ai ta mane torasuja.

⁶ Eto bisi na ingasora amo bisi aisuja eto ahihi na ingesora amo ahihi aisuja.

⁷ avoeto ke erena avo umo God na au meni isapa sira ao eha ingarako asora avo umo ingito jeneki honeki mane asoa. Ari amo einge ra.

⁸ Pisara amo nainge puvuto ere hoi eto nainge ere pahoi amo umo kiae rate asavi avo ere ingi-hea ainge nombo eto embo ahihi na ingasuja amo ainge aisuja,” ainge enu,

⁹ Nicodemus na, “Ari emo naingeto ari re?” enu

¹⁰ Iesu na ke einge ena, “Umo Israel ta ate poekari embo rate ari emo ereona emo umo kiae rete?

¹¹ Na no degi ta ke be erena, dagota kiari avo ungota degi ere harikitora eto dagota titi na do kiora avo ungota degi ere harikitora te ungo na dagota ke ingari uje ae ra.

¹² Eto na enda ta ari ke erena amo ungo ingae avoeto Utu ta ari ijirono ungo mane ingesova.

¹³ Eto embo nei amuna Utu i ta pambae rate Embo ta Meni Utu i ta iriuja amina enda ta puvija

¹⁴ Eto Moses na ojaga tambu ta mitie o koso o i atahu ta teto jiginu bitinu embomeni na kito ke be ea ainge nombo Embo ta Meni jigoro bitou embomeni na kito

15 ke be eto vasiri daroho umbasuja.

16 Eto God na enda osa peni vahai eto amita Meni avo vahai ikenu enda ta puvuna, avo embo amuna ke be aisuja amo mane amburesuja te vasiri te daroho iresuja.

17 Eto God na amita Meni enda ta ari sasapura avoeto tau irae aja ikae rate amina enda orekaja ikena.

18 Eto embo amuna God ta Meni ke be aisuja embo amo God na au amita ari sapura ta mine hajire mane ikau kesuja. Eto embo amuna God ta Meni ta javo ke be ae aisuja amo God na amita ari sapura ta hajire matu ikau kesuja.

19 Eto God na hajire ikau kesuja amita ke be amo erekira. God ta usasa matu enda ta puvuto mitia avo embo na uje ae ue enana ta ari sasapura avoeto mume ta iresi uje ere ora.

20 Eto ke erena emo embo amuna ari sapura ue usasa oju ue tiumbeto pambasuja amita be amo amita ari sapura avo usasa na harikeuja eto

21 Embo amuna ke be ijie iriuja amo God ta hondateari na ari tapa euja avo embo ta titina kiora usasa ta pambuja.”

Eto iji tutumota John na Iesu harikena.

22 Eto amita ambota Iesu na ambotani ga enda Judea jo ta isa ue embomeni bapataito unu

23 John na da Aenon da Salim engiti umo isapamanie ai ta embomeni bapataito ena

24 amo John tipura ta ikae kitit ta ena.

25 Eto John ta ambotani te Judea embo vahai te aingeto donda egari eto hamo te ingenit te egeora amita otoku ari ta ke avo kaseo irae enu,

²⁶ pambuto John ta degi ke einge ea, “Ate Poekari Embo, embo vahai umo Jordan ovitiho ta umo te mitei harikete kogora amina embomeni bapataito oi embo isapamane amita degi ere pahora.” ainge eo

²⁷ John na ke einge ena, “Embo ta uje na mane umbuto eora te God na Utu ta ikeoi umbuto eora.

²⁸ Eto ungo ke matu ijione ingiova amo na Judea ta hondate ari embo Keriso manera te na amita embere katari embora.

²⁹ Kakara amo singa amita jimbari be ra eto amita namei na jimbari embo ta ke ingito tunga javotoho euja ainge nombo na ke avo ingito tunga javotoho be ere ona.

³⁰ Eto embo amina peni aisuja eto na isapa aisona

Utu i ta eto puvurari Embo amo peni be ra

³¹ Eto embo Utu ta eto puvurari amo embo tapa nembari ra. Eto embo enda ta ingari amo enda ta ari eto enda ta ke avo euja.

³² Eto embo Utu ta eto puvurari amita ke te ari te do ingari eto do kiari avo hande euja te embo isapamane na mane ingiora.

³³ Rate embo amuna amita ke ingiuja amo God ta ari avo ke be euja

³⁴ Eto God na Embo amita ikari puvurari amita degi Ahihi Otohu ikeoi jo eneteoi God ta ke be avo hande euja.

³⁵ Eto God Mamo na amita Meni osa euja avoeto ari tapa Meni ta ingenii ta iketo touja.

³⁶ Eto embo amuna Meni ke be aisuja amo vasiri daroho umbutoiresuja te embo amuna Meni ke be ae aisuja amo vasiri daroho mane

umbasuja te God ta tumo avo amita hamo ta daroho iresuja.”

4

Iesu na enda Samaria pamone ga ke ena

¹ Eto embo isapamane Iesu ambo ambo uo bapataito eo John ta ambotani nembena avo Pharisee embomeni na ingia

² (Rate Iesu na bapataito ae rate ambotani na bapataito ea.) Eto Pharisee embomeni na Iesu ta ambotani isapamane ea amita duru avo ingia avo Iesu na kito

³ enda Judea toto enda Galilee ta pambuna.

⁴ Eto enda Galilee ta pambasi pambuto enda Samaria orohuta pambuto

⁵ da Sychar Jacob na meni Joseph ta enda ikena amita engiti

⁶ Jacob ta umo timbari hoto ai puvuna, eto iji 12 o'clock unu degi koso avoeto jangu indesi umo timbari hoto engitita arumbeto mitinu

⁷⁻⁸ amita ambotani indari umbasi da jo ta pahuo enda Samaria pamone vahai amo umo timbasi puvunu Iesu na kito pamone ta degi, “Na umo timbuto ike indone,” ainge enu,

⁹ Pamone amina ke mine einge ena, “Ke umo do ere. Judea embomeni na nango Samaria embomeni mane umoro eora te inena nane umo timbuto ikana ke ere?” ainge enu,

¹⁰ Iesu na ke einge ena, “Eto inena God ta hande te eto embo amuna no degi ta umo indesi penunu eria avo kiaetea amo inena daroho irari umo avo penunu eto umbaetea,” ainge enu,

¹¹ Pamone amina ke mine einge ena, “Embo, no umo timbari ovu irae eto hoto emo tu be ta avoeto naingeto inena daroho umo timbuto nau ikao?

¹² Nangota mama Jacob te amita meniundi te o te aingeto indito umo hoto emo nangota ikarira te umo dagota mama Jacob nembari rete?” ainge enu

¹³ Iesu na ke einge ena, “Eto embo amuna umo erevi indesuja amo ehako umo ujeje aisuja,

¹⁴ rate umo nanena ikasona amo indou ambota ehako umo ujeje mane aisuja te amita jo ta kuru vivitie vasiri te daroho iresuja.” ainge enu

¹⁵ pamone amina, “Embo, umo erea avo ikao indono umo ujeje mane ai, eto na umo ujeje ururou ehako ei umo timbasi mane puvuresona.” ainge enu,

¹⁶ Iesu na, “Pambuto no ivu jage ejo puvuroi,” ainge enu

¹⁷⁻¹⁸ Pamone amina, “Ivu nau irae,” ainge enu Iesu na, “Ke be erea no ipone matu tapa 5 rate vahai eha umoga mitia amo ivu no manera avoeto ivu no irae ke erea amo ke be ra.” Ainge enu

¹⁹ Pamone amina, “Embo, nane umo ere kogona amo perovetara,

²⁰ te dagota mamamane na tiri ei ta God jakeka ere ijiaetera te ungo na da Jerusalem ai ta God jakeka ara ke eova.” Ainge enu,

²¹ Iesu na ke einge ena, “Pamone, umo ke nau avo ke be ejo. Iji puvuto ere hua emo tiri ei eto da Jerusalem ai ta God Mamo avo mane jakeka aisora te amo eingera.

²² Ungo Samaria embomeni amo God kiae rate teho jakeka eova te nango Judea embomeni na

God kogue jakeka eora eto God na Judea enda ta eto embo tapa orekasuja

²³ Eto iji matu puvuto mitia emikote embomeni na jo te ahihi te ke be te na Mamo God jakeka aisora amo God na jakeka be aravo ingito osa aisuja.

²⁴ Eto God amo Ahihi avoeto embo na ke be te ahihi te na jakeka ara uje ere ua.” Ainge enu,

²⁵ Pamone amina ke einge ena, “Na kogona amo Keriso, ungotenau hondate ari embo amo puvuto ke tapa au ingesora,” ainge enu,

²⁶ Iesu na, “Embo puvurosuja ke erea embo amo umo te ke eria, embo amo namora,” ainge ena.

²⁷ Eto ke ainge ijinu Iesu ta ambotani na egerembeto puvuto Iesu pamone amiga ke ijie mitinu kito ti kakambukea te do uje eto pa amiga ke ere ijina avo eto ingae toa.

²⁸ Eto pamone amina amita umo timbari ovu tonu benu da ta tutuveto pambuto amita embomeni ta degi ke einge ena,

²⁹ “Embo vahai puvuto mitia emina ari nau tapa do eona avo hariketei ingena avo Keriso rete pambuto kivu.” Ainge enu,

³⁰ embomeni na da ta eto kesi pahuo,

³¹ ambotani na Iesu indoja uje eto ke eingea, “Ate Poekari Embo, umo indari erekvi umbuto inda,” ainge eo

³² Iesu na eingea, “Indari nau degi ta mitia amo ungo kiaera,” ainge enu,

³³ ambotani na ke ungo eonga mine ara eto eingea, “Embo amuna indari iketere indei?” Ainge eo,

³⁴ Iesu na ke einge ena, “Indari nau amo na ikari embo amita pure ana uje eto ikena avo ano irae aisuja.

³⁵ Eto ungo ke eova amo ‘hariga 4 irae au donda be gasa aisuja avo kahumbeto be umbasora’ ainge eova te ungota degi erena, ungo pure poeto kivu, matu gasa eto giroro eto kahumbari inono etija.

³⁶ Eto be umbari embo na amita mine matu uhue harau ta ikitie vasiri te daroho iresuja. Avoeto be urari embo te eto umbari embo te ainge eto tunga javotoho ere ora.

³⁷ Eto timu hatirari ke erena amo ke be ra, embo nei be ureuja eto embo nei amo be kahumbeuja,

³⁸ Eto na ungo embo nei ta pure ta iketene be ere kahumbitova. Amo embo nei na pure ngahia ena te ungo na pure ta mine avo ere uhova.”

³⁹ Eto enda Samaria da ai ta mitiaetera amina pamone amita ari tapa avo Iesu na harikenu pa amina ingina avo enu embomeni na ingito Iesu ke be

⁴⁰ eto puvuto Iesu avo embomeni amiga iroja uje eto penunu eo iji heriso Iesu na da ai mitie ke ijiniu

⁴¹ embomeni isapamane na Iesu ke be ea.

⁴² Eto embomeni na pamone amita degi ke einge ea, “Nango ke no ete ingera avo pere mane rate amita pe ta ke ei ingito amo enda ta orekari embo be ra ainge ijie ke be erera.”

Eto Iesu na embo okose ta meni enu kondena

⁴³ Eto Iesu na iji heriso irae enu enda Galilee ta pambuna.

44 Eto Iesu na ke erevi matu ena, “Da vahai embo na God ta perovetaasuja amo da vahai embomeni amita na mane osa aisora.” ainge ena,

45 rate Galilee ta puvunu Jerusalem pondo ta ari neite neite enu avo embomeni na kito puvuto mitio Iesu puvunu kito pekea.

46 Eto Iesu na da Cana enda Galilee ai ta umo enu ‘wine’ ena da ai ta ehako puvuto mitinu

47 koto umbari embo okose na amita meni avo da Capernaum ta mitie ambure sapura be umbuto amburari ahumpa be unu puvuto (Iesu da ta puvurari ke ingito puvuto) Iesu ta degi meni kondaja penunu enu

48 Iesu na ke einge ena, “Umo teho na ke be mane asoa te vasiri te ari neite neite avo kiti kesi uje ere oete?” ainge enu,

49 embo okose amina, “Embo, nau meni amburesi ere ua avoeto sausau ungote pambasira,” ainge enu,

50 Iesu na, “Umo oenga pambu, no meni matu eretija,” ainge enu,

51 embo amina Iesu ta ke avo tumota ue degi ta pahunu amita bande ta pure embo vahai na puvuto degi ta tambuto, “No meni matu eretija,” ainge enu

52 ingito ke einge ena, “Iji deina eretei.” ainge enu, “Iji matu amita ture 1 o’clock amina hamo bevere jamo etija,” ainge enu

53 embo amina Iesu na amita meni eraja ke ena amo iji 1 o’clock unu ke ena avo hotembeto embo amite eto amita bande vahai embomeni te aingeto Iesu ke be ea.

54 Eto Iesu na enda Judea ta eto pambuto Galilee

eto orohuta hajire nei ena eto nei erevi ena.

5

Iesu na Umo ireremba javo Bethzatha ai ta embo vahai enu kondena.

¹ Eto amita ambota Judea ta pondo iji nei Iesu na da Jerusalem ta aumite pambuna.

² Eto da Jerusalem ai ta o ‘sheep’ ta torari huga pe amita engiti ta embo ta umo ireremba amo Judea ta ke na Bethzatha ke eora amo arara tapa 5 amina umo amo joekari

³ eto popora embo titi vahaikari eto utu ihirari eto ingeni meni amburari amina arara ai ta mitie umo simba ere uatera.

⁴ Avo God ta anera na beto umo enu vasiri unu popora embo vahai amina kiti umo ai ta sorueto beto kuteto kondena

⁵ Eto embo vahai ai sereketo mitina amita ambure umbuna amita juu tapa 38

⁶ Avo Iesu na amita ambure iji koso mitiaetija avo kito, “Umo kondasi uje ere oete?” Ainge enu, embo amina ke mine einge ena,

⁷ “Embo, na umbuto umo ta ikari embo irae avoeto umo ta pahuore embo nei na na seniketo umo ta beuja,” ainge enu,

⁸ Iesu na einge ena, “Umo ereto no evari besi umbuto pambu.” ainge enu

⁹ embo amina kondeto amita evari besi umbuto pambuna. Rate jangu indari iji te ari erevi ena,

¹⁰ avoeto Judea embomeni na embo kondena amita degi ke einge ea, “Umo jangu indari iji te no evari besi umbuto ere pahoaa amo ke pepeni ere poikittoa,” ainge eo,

¹¹ embo amina ke mine einge ena, “Ke be rate na etei kondetena embo amina etei evari besi umbuto ere pahona,” ainge enu,

¹² enana na, “Embo amuna etei umbuto ere pahoe?” ainge igio,

¹³ Iesu na embo isapamane ta orohuta pahunu popora embo kondena amo kiae ena.

¹⁴ Eto ambota Iesu na popora embo kondena avo temple jo ta kito ke einge ena, “Umo kondetea te no ari sapura tapa avo tojo. Eto no ari sasapura tapa toae amo hajire ngahia be no degi ta puvuresuja,” ainge enu,

¹⁵ embo amina egerembeto pambuto Judea embomeni ta degi, “Na Iesu na etei kondetena,” ainge ena.

¹⁶ Eto Iesu na jangu indari iji te ari neite neite ena avo eto Judea embomeni na Iesu ta degi pambuto ke ngahia eo,

¹⁷ Iesu na ke mine einge ena, “Nau Mama na iji tapa pure euja avoeto na ainge ereona.” ainge enu,

¹⁸ Judea embomeni na jangu indari iji te ke pepeni poekena avo pere mane rate Iesu na God amo amita Mamo eto Mamo ga inono ke ena avoeto naingeto taro amburesuja avo degi jombure ea.

Iesu amo God ta Meni be ra

¹⁹ Eto Iesu na enana ta pehumba ta ke mine avo einge ena, “Na ungota degi ke be erena, Meni na eonga mane euja te Mamo na do euja avo Meni na kito euja avoeto Mamo na do euja amo Meni te tapa euja.

20 Eto Mamo na Meni osa ue amita ari tapa amo eoi kiuja. Eto au Meni na vasiri sovera te aisuja amo ari eha ere ona eingeko mane avo ungo na kito haha puha aisova.

21 Amita be amo embo ambuvujekari Mama na au vasiri te erasora ainge nombo Meni na amita uje na siriketo au vasiri te erasora

22 Eto Mamo na embo ta ari sasapura siriketo hajire mane ikeuja te embomeni na God Mamo amo Otohu ke eora ainge nombo God ta Meni Otohu ke ara God na eoi Meni na ari sasapura ta hajire siriketo ikeuja.

23 Rate embo amina Meni otohu ae eora ainge nombo Meni ikari Mamo avo otohu ae eora.

24 Eto na ungota degi ke be erena. Embo amuna nau ke ingito na ikari embo avo ke be ijie tumota ere ua amo irari daroho matu umbuto iresuja amo amburari ta eto ereto amita ari sasapura ta hajire mane kesuja te tiumbetei vasiri te daroho mitia.

25 Eto ungota degi ke be erena, iji puvija amo matu puvija amo embo ambuvujekari na God Meni ta ke avo ingito be ingesora amo vasiri te erasora

26 Amita be amo Mamo amo vasiri ta susu avoeto Meni amo etei vasiri ta susu ere ua.

27 Eto amo Embo ta Meni avoeto etei ari sirikari ta embo peni etija.

28 Eto ungo ke erevi ingihe jopapa mane aisova te embo amburari na Embo amita ke ingihe use toto ereto

29 Ari jajavotoho embomeni na vasiri te daroho iresora te ari sasapura embo avo hajire ikau kesora.

Iesu ta ari harika ari Embora

³⁰ Rate na eonga ari inono aera te ari erevi naingeto sirikasona avo eoi ingito eona te nau uje na mane eona te na ikari embo ta uje avo pere eona avoeto embo ta ari sirikasona amo ke be na pere aisona.

³¹ Eto ari nau deire avo na eonga harikasona amo ke be mane ra.

³² Te ari nau harika ari Embo nei mitia amina harikasuja eto na kogona amo Embo amita harikari amo ke be ra.

³³ Eto ungo na John ta ke ingora iketeve pambuto amita ke avo be pere ingihara.

³⁴ Rate embo na na orekari ta ke avo ae rate ungo God na orekasuja amita ke avo erena.

³⁵ Eto John amo ungota horivo ijimbeto usasa ikari embo avoeto ungo usasa iji isapa kito tunga javotoho eova

³⁶ te ke nau amo peni John ta ke amo isapa ra. Nau Mama na nane pure ana ikena avo ururono embomeni na kesora avoeto na ikari Embo amo nau Mama avo embo na be kesora.

³⁷ Eto nei amo nau Mama, na ikari Embo, amina na amunure avo ungota degi eoi mane ingiova eto amita ke avo ungo ingiova te amita hamo avo do aingere amo ungo kiae ra.

³⁸ Eto God na amita Meni iketei puvija avo ungo ke be ae avoeto amita ke avo ungota jo ta irari uje aera.

³⁹ Eto ungo God ta ke kajari avo iji tapa eteketo kogue vasiri daroho ai ta umbasi eova te God ta ke kajari amina na amunure avo harikeuja,

⁴⁰ rate ungo vasiri daroho umbasi nau degi ta puvurae eova.

⁴¹ Na embo peni ke ijie ungo na na osa ana ke aera

⁴² Eto na ungota jo amo na kogona ungo God osa ae embopora.

⁴³ Eto na nau Mama ta javota puvena te ungo na na pekaera eto embo nei na tohota javo ta puvuraetija amo ungo na pekaeteva.

⁴⁴ Eto God vahai amina ungo javotoho retemo sapura re avo ere kogua te amo ungo be hotembiae ue embo nei na ungo jakeka ara uje isapamane eova avoeto ungo naingeto God ke be avo.

⁴⁵ Ungo nane God Mamo ta tombu ta pehumba eona mane hotembasova te ungota embo vahai Moses avo ungo tumota eova embo amina ungo Mamo ta titi ta pehumba aisuja.

⁴⁶ Eto Moses na ke kajena amo namo avoembo kajena te ungo Moses tumota ue namo te tapa tumota aeteva

⁴⁷ rate ungo Moses ta ke kajari avo ke be ae eova avoeto ke nau ungo naingeto ke be avo?" ke ainge Iesu na onde katena.

6

*Iesu na embo 5,000 unduna
(Matthew 14:13-21, Mark 6:30-44, Luke 9:10-17)*

¹ Eto emitia ambota Iesu na umo javo Galilee (amita javo nei Tiberias) avo embuto ovitihi ta pambuto mitie ari neite neite ue embo kokondekena

² avo kesi embomeni isapamane na ambo ambo ue puvuo

³ Iesu na heti i ta amita ambotani ga bitito arumbena.

⁴ Eto Iesu na ari erevi ena amo Judea ta jarukari pondo ari iji puvuto auvitinu ena.

⁵ Eto Iesu na arerembeto embo isapamane puvutuhuo kito Philip ta degi ke einge ena, “Ungote indari nainge koro na ombuto umbuto embo isapamane emo unduroro?” ke ainge ena

⁶ amo Iesu na do aisuja amo matu kina te teho Philip ta degi au Philip na ke do au ingesi avo eto ingina

⁷ Eto Philip na ke mine einge ena, “Ungote koro peni vahai na bread umbaetera amo embo vahai vahai na pereto indoro inono mane aisuja.” Ainge enu.

⁸ ambotani nei Simon Peter ta namei Andrew na einge ena,

⁹ “Meni isapa emina bread 5 umo o heriso, ainge umbuto puvuto mitia te inono manera,” ainge enu

¹⁰ Iesu na einge ena, “Aravora te evu embomeni tapa arumbare.” ainge enu embo tapa 5,000 te pamone te meni isasaraho te tapa enena ta arumbeo

¹¹ Iesu na bread tapa 5 umbuto God ta degi peketo embo arumbea amita degi ikena. Eto umo o heriso amite tapa ikenu embomeni tapa indio inono enu

¹² Amita ambotani ta degi einge ena, “Indari indera amita ihehe avo aija mane asova te tapa siriketo umbuvujo.” ainge enu,

¹³ ihehe siriketo umbua bread amo tapa 5 rate hambija tapa 12 amo ihehe na pevitina.

¹⁴ Eto Iesu na ari erevi enu embomeni na kito ke einge ea, “Peroveta enda ta puvuresuja ainge

ijiore simba ere ovora amore erekira,” ainge ea.

¹⁵ Eto embomeni na Iesu ta degi ke vasiri na eto aro enana ta king aja ke asora avo Iesu na kito umo eonga beto tiri ta pambuna.

*Iesu na umo hamo ta isa ena.
(Matthew 14:22-33, Mark 6:45-52)*

¹⁶ Eto ture vovunu ambotani na da Capernaum umo ovitiho ai ta pambasi umo hora ta beto

¹⁷ e nga ta bitia eto Iesu tiri ta pambuna amo puvurae enu mume sihukitunu

¹⁸ e nga ta pahuo pisara peni vahai be puvuto umo piri unu

¹⁹ e nga tavitie 6 o 7 kilometre ainge pahuo Iesu na umo hamo ta haito puvutuhunu kito oju uo

²⁰ Iesu na kito ke eingea, “Namora, ungo oju avojo.” ainge enu

²¹ Iesu e nga ta bitoja uje ea te degi pambasi uje ea avo matu puvua

Da Capernaum ta ke kasari bande ai ta Iesu ga ke mine ara ea.

²² Eto embomeni asa umo ovitiho ta toa amina iho bujenu e nga vahai be avo mitina ai ta ambotani na pere bitito pahuo Iesu avo e nga ta bitae

²³ kito bread india degi amita engiti ta da javo Tiberias ai ta e nga nenei puvua avo Iesu te ambotani te puverete avo kesi pambua

²⁴ rate kiae eto e nga nei ai bitito Iesu jombure asi da Capernaum ta pambua.

Iesu amo Utu i ta indarira

²⁵ Eto pambuto Iesu tambuto ke eingea, “Ate poekari embo, umo nainge eto puve?” ainge eo

26 Iesu na ke mine einge ena, “Na ungota degi ke be erena, ungo God ta ari neite neite keva avo ae rate indari peni vahai be indeva avo eto na jombure ere ova.

27 Te indari amo sari aisuja avo eto ungo indari ta pure avojo, indari nei vasiri te daroho iriuja amita pure avo evujo. Eto indari avo Embo ta Meni na hande ikasi ere ua, Eto God Mamo na Embo ta Meni javotoho ke eria,” ainge Iesu na enu

28 Embomeni na ke einge ea, “Eto God na dago pure do ara uje ere oi?” ainge eo

29 Iesu na ke mine einge ena, “God ta pure amo erekira: God na Embo iketei puvija avo ke be ijie tumota evujo,” ainge enu,

30-31 mine einge ea, “God ta ke matu kajari ai ta ke einge mitia. ‘Amina bread Utu i ta ikenu embomeni na india,’ ke ainge kajari mitia amo dagota mamamane na ojagatambu ta mitie Utu i ta bread avo india te inena pure do ao no hajire avo kito ke be aro?” ainge eo,

32 Iesu na ke einge ena, “Na ungota degi ke be erena, Utu i ta bread avo Moses na ikae rate nau Mama na Utu i ta bread be avo ikeuja

33 Eto God ta bread be avo Utu ta eto beto embo tapa ta degi vasiri ikeuja,” ainge enu

34 “Embo, bread avo dagota degi matuainge ikejo indore,” ainge eo,

35 Iesu na ke einge ena, “Vasiri te irari bread amo namora. Eto embo amuna nau degi ta huresuja amo beuja mane kesuja. Eto na tumota aisuja embo na mane umo ujeje kesuja

36 Eto na ungota degi matu ijiena te ungonna na

titi na ere kogova te na tumota ae ere ova.

³⁷ Te God na embo nau degi ta ikasuja amo nau degi ta hururoro na mane toasona te umbasona

³⁸ Eto na Utu ta eto puvena amo uje nau avo aisi puvuraera te na iketei puvena Embo amita uje avo pere aisona.

³⁹ Eto embo na iketei puvena amita uje amo embo tapa nau iketija amo nei vahai mane beto pambasuja te iji kombu te ano tapa erasora.

⁴⁰ Erena amo nau Mama ta uje amo embo amuna God ta Meni kito tumota eto vasiri daroho umbasuja amo iji kombu te ano vasiri te erasuja,” ke ainge Iesu na ijinu

⁴¹ Judea embomeni na ‘Na bread Utu ta bearira’ ke ainge Iesu na ena avo ingito isoro ke ungo eonga ijie

⁴² eingea ea, “Embo emitia Mamo Joseph ra eto amita e mamo amo ungotena kiarira te doeto Utu ta eto bearri ke erei?” ainge eo

⁴³ Iesu na ingito, “Ungo isoro ke ungo eonga ereva avo tovu.

⁴⁴ Eto embo na eonga nau degi ta mane huresuja te God na jigito gorukau huresuja embo amo na iji kombu te ano erasuja.

⁴⁵ Eto peroveta na ke eingea kajea, ‘Embo tapa avo God na ate poekasuja’ ke ainge kajari mitia avoeto embo amuna God ta ke ingito kiari uhue nau degi ta puvuja.

⁴⁶ Rate embo na God ta tombu kiaera te Embo God ta degi eto puvurari amina God kiarira

⁴⁷ te na ke be erena embo amuna ke be ijie tumota aisuja amo vasiri daroho umbasuja.

⁴⁸ Eto na vasiri daroho ta bread ra,

49 te ungota mamamane na ojagatambu ta mitie bread Utu ta eto beari avo india te irae ambuvujekea

50 te bread Utu ta eto beari erena emo indito mane amburesora,

51 te bread vasiri te Utu ta eto puvija ke erena amo namora eto embo amuna indesuja amo vasiri te daroho iresuja. Eto bread ikasona amo nau bisi avo enda ta embomeni vasiri te irora ikasona,” ke ainge Iesu na enu,

52 Judea embomeni na tumo ue ke ungo eonga eto eingea, “Do eto embo emitia bisi ikau ungo-tenane indoro?” ainge eo,

53 Iesu na ke mine eingea, “Eto ungo ta degi ke be erena. Embo ta Meni ta bisi te sasaga te indae aisova amo ungota degi vasiri mane iresuja,

54 te embo amuna nau bisi te sasaga te indesuja amo embo amita degi vasiri te daroho iresuja avoeto iji kombu ta jigono erasuja.

55 Amo nau bisi te nau sasaga te amo indari be avoeto,

56 embo amuna nau bisi te sasaga te indesuja amo na embo amita jo ta iresona eto embo amo jo nau ta iresuja

57 Ke amo erevira, nau Mama vasiri te na na iketei puvuto amita degi vasiri ere uhona ainge nombo embo amuna na indito nau degi ta vasiri umbasuja.

58 Eto bread Utu ta eto beari erena amo ungote-nau mamamane na indito ambuvujekea ainge mane rate bread erevi indesuja amo vasiri te daroho iresuja.”

59 Ke ainge da Capernaum kasari bande ta enu

Daroho irari ta ke amo Iesu ta degi mitia

60 Ingito amita ambotani nei uhoho na einge ea, “Ke emo sapura be avo ere ingihera avoeto embo na naingeto ke erevi ambo ambo aro?” ainge

61 tumo te tapa ea avo Iesu na kito ke einge ena, “Eto ungo ke erena avo ingito tini kambari ere ovete?

62 Embo ta Meni na beari degi ta bivitirou ungo kito do hotembavo?

63 Eto bisi na nei do mane ikeuja te Ahihi na vasiri ikeuja avoeto na ke erena amo ahihi te vasiri te amita ke avo erena.

64 Rate ungo nei uhoho na ke be ae eova.” Ainge Iesu na ena amita be amo Iesu ke be ae embopo eto embo nei Iesu ta jenge indesuja embo amo Iesu na matu itikari ta kina.

65 Eto ke nei einge ena. “Avoeto ungota degi ke matu ijieni amo embo na mane nau degi ta huresuja te God na au huresuja ainge ijieni.”

66 Eto ke ainge ena amikote ambotani nei uhoho na Iesu ambo ambo ae toto ungota uje ta pambua.

67 Eto Iesu na ambotani 12 ta degi ke einge eto ingina, “Eto ungote tapa pambasi uje ere ovete?” ainge enu

68 Simon Peter na einge ena, “Bada dago umo toto amuta degi pambaro? Vasiri daroho irari ta ke avo inena hande oe

69 ke be erera eto umo God ta Embo Otohu be avo dago ere kogora,” ainge enu

70 Iesu na ke einge ena, “Nanena ungo 12 avo siriketo uhana te ungo vahai avo Satan ta tohora.” Ainge ena

71 amo embo Simon Iscariot ta meni Judas amo ambotani 12 ra te Judas amina isoro embo ta harikasuva avo eto ena.

7

Iesu na da Jerusalem pondo ta pambuto embo ate poekena

1 Eto iji amita ambota enda Judea embomeni na Iesu taro amburoja ke eo Iesu na kito enda Galilee ta isa ena.

2 Eto Judea ta pondo javo Horoma Pondo auvit-inu

3 Iesu ta ambo jimbi na Iesu ta degi ke einge ea, “Inena degi erevi toto Judea enda ta pambuto no ari neite neite avo ao no ambotani na kiorote?

4 Eto embo amuna nombo aisi uje aisuja amo mane ondikari na aetija avoeto embo tapa ta titi ta ari no avo ao sigeto peni vahai ururou titi na koguroro embo peni aisoa,” ainge ea

5 amo Iesu ta ambo jimbi na Iesu tumota ae avoeto ke emo eo,

6 Iesu na ke mine einge ena, “Iji nau amo puvuraera te ungota iji amo inono be ra.

7 Eto enda embomeni na ungota degi tumo ae rate nanena enana ta ari sasapura harikeona avoeto nau degi ta tumo eora.

8 Avoeto ungo pondo ta pambuvujo, eto nau iji puvurae avoeto na eha pondo ta mane pambasona.” ainge enu

Iesu na pondo ta pambuna

9-10 Namei kamei pahuo enda Galilee ta mitimite embo na kiora ondiketo titiha ta kiae pondo ta pambuna.

¹¹ Eto pondo ue Judea embomeni na Iesu pu-veite puvuraere avo kesi jombure ea.

¹² Eto embomeni na eonga eonga toruketo embo nei na kumumu ke na, “embo amo javoto-hora,” ke iijo embo nei na, “embo amina embo sio umbei ere pahora” ainge ea

¹³ amo Judea ta embo okokose oju ue ke araha ta ae ondikari na ea.

¹⁴ Eto Iesu na pondo orohuta puvuto temple jo ta toreto embomeni onde katitinu

¹⁵ Judea embomeni na kito haha puha ijie ke eingea, “Embo emo school kiae rate naingeto book ere etekitei,” ainge eo

¹⁶ Iesu na kito ke mine eingea, “Ate Poekari nau emo na ikenu puvua Embo amita ate poekari ra te nau hotembari na aera,

¹⁷ te embo amuna God ta uje avo aisuja embo amina ate poekari nau amo God ta degi eto puvurari rete nau degi ta eto puvurari re avo be kesuja.

¹⁸ Eto embo amuna amita hotembari na embomeni ate poekasuja amo embomeni na kito embo peni ke ijie jakeka ara aisuja rate embo amuna ikari embo avo embomeni na jakeka ara ke hande aisuja amo ke sokova na mane hande aisuja te ke be na pere aisuja.

¹⁹ Eto Moses na ke pepeni ikenute ikae re? Eto ikena te ungo tapa na poekeova te do eto na tavo amburona uje ere ove?” ainge enu

²⁰ embomeni na, “Umo ahihi sapura na jo ta torari ra. Embo amuna umo taisi erere?” ainge eo

²¹ Iesu na ke eingea, “Na ari vahai jangu

indari iji te etena avo ungonna kito ke isapamanne
ereva te erevi hotembuju

²² Eto Moses na ando kakamba ava ena (ari amo amina itikae rate ungota ohihi mamatu na itikari ra) Eto ari amo ungo na jangu indari iji te eova.

²³ Eto na ke erena amo ungonna Moses ta ke pepeni agi ue jangu indari iji te embo ta ando kakamba eova ainge nombo na jangu indari iji te embo ta ando javotoho uena avoeto ungo do eto nau degi ta tumo ere ove?

²⁴ Eto ungo embo ta ari javotoho rete sapura re avo titi na kogue pe petiki emina ke re eova te jo na aera,” ainge Iesu na ena.

Embo emo Keriso be rete avo ke kasea

²⁵ Eto iji amikote da Jerusalem embomeni na ke mine ara eto eingea. “Eto embo tasi uje ere ora emo erevi rete o erevi manere?

²⁶ Eto embo emina ke eria te taekae eto nei do ae rate embo okokose na embo erevi Keriso be ere hotembiterete?

²⁷ Eto embo emitia puvurari degi amo ungotena kiarira te Keriso be simba ere ovora avo puvuraetija amo ungotena amita puvurari degi avo mane kiaetera.” Ke ainge embomeni na ea.

²⁸ Eto Iesu na temple jo ta embomeni ta degi ate poekitie ke vasiri na eto eingea, “Eto ungo na kiarira eto na naingeto puvena amo ungo kiarira eto na uje nau eonga na puvurae rate Embo vahai na iketei puvena amo ke be rate Embo amo ungo kiaera te

²⁹ Embo amina na iketei puvena avoeto Embo amo na kiarira,” ainge enu,

³⁰ embomeni na ingito andito umbasi ea te amita iji puvurae avoeto God na taekenu toa.

³¹ Te embomeni nei uhoho ai ta mitia amina Iesu ke be ijie ke einge ea, “Eto Keriso na puvuto ari neite neite aisuja ke eora amo Keriso erekira.” Ainge ijio

Temple ta police na Iesu umbasi pambua

³² Ke peni vahai be enu Pharisee embomeni na ingito temple ta police na Iesu umbuto tipura ta ikara eo pambua.

³³ Eto Iesu na ke einge ena, “Na ungote iji isapa mitima na ikena Embo ta degi ehako egerembeto pambasona

³⁴ Eto ungo na jombure eto tambae asova amo na pambasona degi amo ungo mane pambasova.” Ainge enu,

³⁵ Judea embomeni na ingito ke mine ara ijie einge ea, “Embo emina pambuto mitirou mane tambara ke eria degi mo davorami erei? Eto Judea embomeni Greek enda nei nei ta pambuto iriora ai pambuto ate poekasi ereite?

³⁶ Eto ‘na pambasona amo ungo na jombure eto mane tambasova eto na pambasona degi amo ungo mane pambasova’ ainge eria amita ke be mo deirami erei?” ainge ea.

Eto Iesu na daroho umo ikasi ke ena.

³⁷ Eto pondo iji tutumota pondo iji peni puvunu Iesu na ereto heteto ke vasiri na eto einge ena, “Eto embo amuna umo ujeje ururou kito evujo nau degi ta huroi.

³⁸ Eto embo amuna na tumota ere oi avo evujo hurou umo ikano indoi. Eto God ta ke kajari ta

einge mitia. ‘Amita jo ta umo kuru na bitarako eto vasiri te daroho iresuja.’ ” ke ainge ena

³⁹ amita ke be amo Iesu na pambuto Mamo ta usasa ta toreto Ahihi Otohu ikau puvuto Iesu ke be ea embomeni amita jo ta torasuja amita ke avo ena.

Eto Embomeni na Keriso amunure avo ke taim-bea

⁴⁰ Eto embomeni nei uhoho na ke avo ingito einge ea, “Eto embo emo peroveta simba ere ovora vahai avora.” ainge ijio

⁴¹ embo nei na, “Embo emo Kerisora.” ainge ijio embo nei na, “Keriso simba ere ovora amo Galilee embo na mane aisuja

⁴² te David ta ahije vahai David ta da Bethlehem embo na Keriso aisuja ainge God ta ke kajari ta mitia” ainge ea

⁴³ amo embomeni tapa amita hotembari vahai na ae rate hotembari tunga eonga eonga na ea

⁴⁴ Eto embo nei uhoho na Iesu umbuto tipura ta ikasi uje ea te enana ta ingeni amo Iesu ta hamo ta ingeni jujurukae.

Judea ta embo okokose na Iesu ke be ae ea

⁴⁵ Eto temple ta police na egerembeto priests pepeni te Pharissee embopo ta degi pambuo ke einge eto ingia, “Ungo do eto Iesu umbuto puvrae eteve?” ainge eo

⁴⁶ Police na ke mine einge ea, “Eto embo amina ke ainge ae ingae pekota ke javotoho eria.” ainge eo,

⁴⁷ Pharissee embo na ingito ke einge ea, “Eto ungote tapa embo amita ke ingihe ere pahove?

48 Eto ungo kogova amo kiari embo pepeni te Pharisee embo te na embo avo ke be aera.

49 Eto tumo sosou embopo amina embo amita ke ingihe mitera amina Moses ta ke pepeni avo kiae ue ere pahora amo God na hana kiari iksuja.” ainge eo,

50 embo vahai Nicodemus Iesu ta degi kitipambuna amina ke eingene.

51 “Eto embo ta sapura deire avo ganoka eto ingae teho sio umbasora amo ungotenau ke pepeni Moses na kajena amo ainge rete?” ainge enu,

52 Pharisee embomeni na ke mine eingea, “Umo te tapa Galilee embo rete? Umo eonga eteketo ki. God ta peroveta tapa amo da Galilee ta eto mane puvuora,” ke ainge

53 eto embomeni sisiketo pambua.

8

Viro pamone jigito puvua

1 Eto Iesu na tiri javo Olives ta pambuto evunu

2 iho bujenu egerembeto temple ta pambunu embomeni amita degi puvuo arumbeto ate poekitatu

3 Enana ke pepeni kiari embopo te Pharisee embomeni te aingeto pamone vahai avo tiha unu kito umbuto embo tapa ta titi ta embo tapa kiora ikeo hetenu

4 Iesu ta degi ke eingea, “Ate Poekari Embo, pamone erekvi tiha oi kito taeketera

5 eto Moses ta ke pepeni ta amo atara na tiha pamone taro amburoja ena te hotembari no avo ejoringore.” Ainge ea

6 amita be amo Iesu ta degi popoja ke asi umbuto puvua. Rate Iesu na aruse eto beto ingeni na enda ta ahari ue mitinu

7 Embomeni na eto ingari ke kaiketo ijio Iesu na hange ambu eto ke einge ena, “Ungo embo puveva amo embo vahai amuna ari sapura irae embo amina karu umbuto kiti taisuja.”

8 Ke ainge eto titi tu ta eto enda ta ahari unu.

9 Embomeni na ingito sisiketo embo kerembo amina eonga pahunu eto embo nei nei amo vahai pamba uo pamone eonga Iesu ga heteto mitinu

10 Iesu na hange ambu eto pamone amita degi ke einge ena, “Pamone, embo naingere, eto embo vahai amuna umo pehumba aerete?

11 Aravora, te nane umo mane pehumba asona te umo pambuto no ari sapura toto irari javotoho na irijo,” ainge Iesu na ena.

Iesu amo enda ta usasa ra

12 Eto Iesu na embomeni ta degi itiketo ke einge ena, “Na enda ta usasara. Eto embo amuna na ambo ambo aisuja embo amo mume ta isa mane aisuja te vasiri daroho ta usasa amo amita degi iresuja.” ainge enu

13 Pharisee embomeni na ingito ke mine einge ea, “No harika ari embo irae umo eonga erea amo ke be mane asora.” Ainge eo

14 Iesu na ke einge ena, “Ari nau avo na oenga harikitona amo ke be ra. Na puvurari degi eto na pambari degi amo na kiarira te na puvurari degi eto pambari degi amo ungo kiaera.

¹⁵ Eto ari javotoho davore sapura davore amo ungota enda ta ari avo ungo embo na eova nanena embo kogue embo emo sapurara eto embo emo javotohora ainge mane eona

¹⁶ te ke aisona amo ke be na pere aisona amita be amo na ikari embo amo namote mitia amina ijioi eona.

¹⁷ Eto ungota ke pepeni ta kajari mitia amo eto embo heriso na jo vahai eto ke vahai aisora amo ke be ra.

¹⁸ Avoeto ke nau erena amo na ikari Embo Mama nau amiga ke emo erena avoeto dago heriso na ke emo harikitora.” Iesu na ainge enu,

¹⁹ Pharisee embomeni na, “Mamo no davore?” ainge ena, “Ungona na kiae ere ova ainge Mama nau ungo kiae ere ova te ungona na kiaeteva ainge Mama nau amo ungo kiaeteva.” Ke ainge ena amo

²⁰ temple jo ta God ta hande ikari degi ai ta ke emo ena. Amo Iesu ta iji puvurae avoeto andito umbae toa.

Judea embomeni na Iesu ke be ae ea embopo amita degi Iesu na ke ena.

²¹ Eto Iesu na ke nei einge ena, “Eto na pambasona amo ungona na jombure ue ungota ari sasapura avoeto ungo amburesova. Eto na pambasona ai ta ungo pambari inono ae aisova.” Ainge enu

²² Judea embomeni na ke mine ara eto einge ea, “Na pambasona ai ta ungo mane pambasova ainge eria amo umo eonga teto amburesi ereite?” Ainge eo,

²³ Iesu na einge ena, “Ungo enda embopora eto na Utu embo ra. Eto ungo enda erekvi tohora te na enda emitia toho manera.

²⁴ Eto na ungota degi ke matu etene ingeveda amo ungota ari sasapura avoeto amburesova. Eto kivu, na amunure avo ke erena amo ungo ingito ke be ae ere ova amo ungota ari sasapura avoeto amburesova,” ainge Iesu na enu,

²⁵ “Umo amunure?” ke ainge eo Iesu na “ke matu kiti ungota degi ijiena amo namora.

²⁶ Eto na ungo embo ke isapamane aetena eto ungota ari sasapura isapamane harikaetena te na ikari Embo amita ke amo ke be perera avoeto amita ke avo nau degi ta enu ingia avo enda embo ta degi hande ere ona.” Ainge ena amo

²⁷ Iesu na amita Mamo God avo ke ena te embomeni na ingae uo,

²⁸ Iesu na ke einge ena, “Eto kiari amo nau mane rate nau Mama ta kiari nau degi ta ikena avo ungota degi hande eona avo eto Embo ta Meni i ta tavo mitirou ungonna na amunure ke eona avo kito ke be aisova.

²⁹ Eto na iji tapa na ikari Embo ta uje tapa avo eona avoeto na egikae namote tapa mitia.” Ke ainge

³⁰ ijinu embo isapamane na Iesu ta ke avo ingito ke be ea.

Judea embomeni ta Ohihi Abraham

³¹ Eto Judea embomeni Iesu ke be ea amita degi Iesu na ke einge ena, “Eto ungo ke nau avo be jigesova amo ambotani nau be ururovo

³² Nau ke be avo ano ingihirovo ke be amina ungo ari sasapura na andirari avo vujekasuja” Ainge enu

³³ ingito ke mine einge ea, “Dago ta Ohihi Abraham ta degi eto puvurari eto embo nei na dago pundurae mitovora erekira te umo do eto dago vujekasi ke ere?” ainge eo,

³⁴ Iesu na ke einge ena, “Na ungota degi ke be erena, Embo amuna ari sapura aisuja amo ari sapura na pudurari avoeto ari sapura ta pure ari embora.

³⁵ Eto pure ari embo na bande ta daroho mane iresuja te meni be amina bande ta iresuja.

³⁶ Eto ungo ari sasapura na pudurari avoeto God ta Meni na ungo bujekaetija amo ungo na jeneambuetu daroho iraeteva.

³⁷ Eto ungo Abraham ta meniundi amo na kiari rate ungota ohihi Abraham hotembae ue ke tapa do erena avo ungota jo ta torae avoeto na taisi ere ova.

³⁸ Rate namo avo nau Mama ta degi do kiona avo ke hande ere ona te ungo avo kogue ambo ambo ere ova.” ainge Iesu na enu,

³⁹ Embomeni na, “Dago ta Mama Abraham ra.” ainge eo, Iesu na, “Ungo Abraham ta meniundi kito amo Abraham na ena ainge nombo aeteva.

⁴⁰ Amo na God ta ke be avo ingihe ungota degi erena te ungona na taisi ere ova te Abraham na ari ainge amo ae ra.

⁴¹ Rate ungo eova amo ungota mama na euja vahai avo eova.” ainge Iesu na enu embomeni na ingito ke mine einge ea, “Dago suhita ari na ingae rate dagota mama amo God eto dago amita

meniundi ra.” ainge eo.

⁴² Iesu na ke einge ena, “Eto God amo ungota Mamo kito amo na osa aeteva amo na God ta degi puvuto mitena amo uje nau na puvurae rate na amina ikenu puvua,

⁴³ te ke erena emo ungo ingito mana mana ue ingari inono ae avoeto ere ova.

⁴⁴ Te ungota mamo amo Satan avoeto amita pure avo asi uje ere ova amo iji kititama embo tari embo eto embo amita ke be irae ke sokova avo pere iriuja. Avoeto embo amo ke sokova ta mamora eto embo amo ke ijie amo amita jo ta hotembari ke sokova avo puvuja.

⁴⁵ Rate nanena ke be eona avoeto ungona na ke be ae eova.

⁴⁶ Te ungo embo vahai na nau ari sapura vahai do eone kiove avo harikevu ingone. Eto na iji tapa ke be pere eona te ungo do eto na ke be ae eove?

⁴⁷ Eto God ta Meni na God ta ke ingiuja te ungo God ta ke ingae eova amo ungo God ta meniundi mane avoeto.” Ainge Iesu na enu,

Iesu te Abraham te amita ke

⁴⁸ Judea embomeni na ke mine einge ea, “Dago kogora amo umo enda Samaria embo ahihi sapura na jo ta torari avoeto erea.” ainge eo

⁴⁹ Iesu na ke einge ena, “Na Ahihi sapura na torae rate na nau Mama Otohu eona te ungona na otohu ae ere ova.

⁵⁰ Amo nanena ae rate embo ta ari siriketo hajire ikari Embo amina javo nau otohu ara uje ere ua avoeto hajire amina ikasuja.

51 Eto ungota degi ke be erena, embo amuna ke nau ingito agi aisuja embo amina mane amburesuja.” ainge enu,

52 Judea embomeni na ingito ke einge ea, “Eto umo ahihi sapura na torari ke erera amo ke be perera.

53 Eto Abraham ambuna eto peroveta tapa ambuvujekea te inena ‘embo amuna ke nau agi aisuja amo mane amburesuja’, ke ainge erea amo nangota mama Abraham te peroveta tapa ambuvujekea amo inena nembari rete? Eto umo embo amunurami ke ere?” ainge eo

54 Iesu na ke mine einge ena, “Eto na oenga peni asi aetena amo ke be mane aetija te Mama nau ungo na ‘dagota God ra’ ainge eova amina au embo peni aisona.

55 Te, ungo amo God kiae ere ova te nanena God kiona. Eto nanena God kiae ke aetena amo ungo ainge ke sokova embo aetena te na God kogue ke amita tapa avo ingihe agi eona.

56 Eto ungota mamo Abraham na na puvuresona avo hotembu hotembu ue tunga javotoho ena.” ainge Iesu na enu,

57 Judea embomeni na ke einge ea, “Eto no umbari jua amo 50 mane rate Abraham inena kiari ke erea,” ainge eo

58 Iesu na, “Na ungota degi ke be erena, eto Abraham e na ingae pekota amo nanena miti-aetena,” ainge ena.

59 Eto Judea embomeni na ingito Iesu tasi atara siriketo uhuo Iesu na kito kiae ondikari na temple toto pambuna.

9

Embo e na titi tahimbari ingena avo Iesu na enu kondena

¹ Eto Iesu isa pahue embo e na titi tahimbari ingena avo kogunu

² Amita ambotani na ke eingea, “Ate Poekari Embo, embo emo e ta mamo ta ari sapura na enutemo amita ari sapura na e ta oti ta eto titi tahimbenu avo dago be kesi uje ere ora.” ainge eo,

³ Iesu na eingea, “Amo e ta mamo ta ari sapura mane eto amita sapura mane rate God ta sovera avo embo tapa na kiora enu e ta oti ta eto titi tahimbena.

⁴ Eto iji beae mitirou na ikari Embo ta pure aisona te mume sihukari ahumpa ere ua emo embo na pure ari inono aera.

⁵ Eto na enda ta iriona amo na enda ta usasa avo eona eto aisona.” ainge eto,

⁶ enda ta isuva eto tavenu pegara enu umbuto titi tahimbari embo emita titi ta kuteto,

⁷ ke eingea, “Umo pambuto umo ireremba javo Siloam (Javo amita be amo ‘ikari pambari’) ai ta no titi egejo.” ainge enu titi tahimbari embo amo pambuto umo ai ta titi egena javotoho enu pambuna.

⁸ Eto amita da vahai embomeni te eto embo nenei te aingeto koro penunu ijioi ere koguaetera amina embo avo kito ke eingea, “Eto embo arumbeto mitie koro penunu euja embo amo erekirete?” ainge ijio,

⁹ embo nei na, “En, embo aravora,” ainge ijio embo nei na, “Embo nei, rate tombu hajire

vahaira,” ainge ijio, embo kondena amina, “Na embo aravora,” ainge enu,

¹⁰ embomeni na, “Aravorate no titi naingeto javotoho etei?” ainge eo,

¹¹ embo amina, “Embo javo Iesu na enda ta isuva eto tavetei pegara etei umbuto titi ta kuteto ke einge etija, ‘Umo pambuto umo Siloam ta kute’ ainge etei pambuto umo kutetene titi javotoho etija.” ainge enu,

¹² “Embo amo naingere,” ainge eo. “Embo amo na kiaera,” ainge enu,

*Titi tahimbari embo naingeto kondena avo
Pharisee embopo na jombure ea*

¹³ Embomeni na titi tahimbari embo kondena avo umbuto Pharisee embomeni ta degi pambuo

¹⁴⁻¹⁵ Pharisee embomeni na embo amita titi naingeto javotoho enu ere koguna avo eto ingio titi tahimbari embo kondena amina ke einge ena, “Embo Iesu na pegara umbuto nau titi ta iketei kutetene javotoho etei ere kogona,” ainge enu Iesu na jangu indari iji te pegara umbuto embo ta titi ta kutenu javotoho ena,

¹⁶ avoeto Pharisee embomeni nei uhoho na ke einge ea, “Embo emo jangu indari iji ta ke pepeni ambo ambo ae ere ua embo emo God ta degi puvuraera,” ainge eo Pharisee embo nei nei amina, “Embo ari sasapura embo na ari javotoho einge amo mane aetija,” ainge ijio,

¹⁷ Pharisee embo nei uhoho na ereto isoro ke eto kuru embo kondena amita degi ke ehako einge eto ingia, “Aravorate embo amina no titi etei javotoho etija te no hotembari avo deire

ejo ingore.” Ainge eo embo amina, “Embo amo Peroveta ra,” ainge ena.

¹⁸ Eto Judea embomeni na embo titi tahimbari javotoho ena avo ke be ae ue ke be eto ingesi amita e te mamo te avo eo puvuo

¹⁹ Ke einge ea, “Embo emo no meni rete avo otia eto titi vahaikari puvunute avo naingeto titi javotoho etei ere kogoi?” ainge eo,

²⁰ amita e te mamo te na ke mine einge ea, “Ke be, amo dagota meni otia eto titi tahimbari puvuna te

²¹ embo amuna etei titi javotoho etei ere kogua amo dago kiaerate dago ta meni amo embo penira amita degi eto ingavu,” ke ainge ea

²² amita be amo Judea embomeni na embo amina Iesu amo Keriso be ra ainge aisuja amo kateketo eonga iresora ke ainge matu ari ingari avo hotembeto oju eto

²³ ungo eonga meni ta degi eto ingora ke ea.

²⁴ Avoeto Judea embomeni na embo avo eo puvunu ke einge ea, “God vahai avo jakeka ejo, eto dago na Iesu avo sapura embo ke eora.” ainge eo,

²⁵ embo amina ke mine einge ena, “Embo amo sapura embo rete avo na kiaera te nau titi samuna ari avo etei ere kogona,” ainge enu

²⁶ Judea embomeni na ke einge ea, “Eto embo amina no degi ta do etei eto no titi javotoho etei?” ainge eo,

²⁷ Ke mine einge ena, “Na ke matu etena amo ungo ingae eto ehako ano ingito amita ambotani aisi uje ere ovete?” ainge enu,

²⁸ Judea embomeni na tumo eto embo avo ke

einge ijie isembea, “Eto umo avo amita ambotani ejo. Dago avo Moses ta ambotani ra.

²⁹ Eto God na Moses ta degi ke ena avo dago kiari rate embo avo naingeto puvuna avo dago kiaera.” Ainge eo,

³⁰ embo amina ke mine einge ena, “Eto ke ungo na ereva amo na manamana ere ona te embo amina nau titi hiriketija avo ungona naingeto puvurari ke ereva,

³¹ te ungotena ere kogora amo God na sapura embo ta ke amo mane ingiuja te embo javotoho God ta pure ari embo amita ke avo ingiuja.

³² Eto iji matu ta eto puvuto eha emite amo embo na e na ingari iji te titi tahimbari amo embo nei na ae javotoho aera.

³³ Eto embo erekvi God ta degi puvurae amo ari amo mane aetija,” ainge enu,

³⁴ enana tumo ue ke einge ea, “Umo ari sapura ue ingari amina dago ate poekasi erete?” ainge ijie kurumbeo ke kasari bande toto pambuna.

Pharisee embopo na ke kiae ea

³⁵ Avo Iesu na ingito jombure pambuto embo avo tambuto ke einge ena, “Umo Embo ta Meni avo ke be ijie ere oete?” ainge enu

³⁶ Embo amina ke mine einge ena. “Embo, Embo ta Meni mo amunure avo ejo na kito ke be ane.” ainge enu,

³⁷ Iesu na ke mine einge ena, “Inena embo avo kogoe embo amina umote ke eria, embo re aravora,” ainge enu,

³⁸ embo amina, “Bada, na umo ke be erena,” ainge eto Iesu jakeka ena.

³⁹ Eto Iesu na ke einge ena, “Na embo ta ari sirikitie embo titi tahimbari embomeni avo ano titi javotoho ururou eto embo nenei titi na kito kiaesira eora avo ano titi tahimbasuja avoeto enda ta puvena.” ke ainge enu,

⁴⁰ Pharissee embomeni ai ta mitia amina ingito ke einge ea, “Eto dago mo titi tahimbari ke ere?” ainge eo,

⁴¹ Iesu na ke mine einge ena, “Ungo titi tahimbari embopo amo na mane pehumba aetena te ungo na ‘dago kiarira’ ainge ereva avoeto ungonia sapura ta hajire kesova.” ainge Iesu na ena.

10

O ‘sheep’ simba ari embo javotoho amita ke.

¹ Eto Iesu na ke einge ena, “Na ungota degi ke be erena, pegene embo na amo o ‘sheep’ ta huga peta mane toreuja te huga jaruketo jo ta beuja

² te o ‘sheep’ simba ari mamo na amo huga pe ta torasi uei

³ huga pe simba ari embo na o ta mamo kito pe hirikeoi toreto amita o ‘sheep’ vahai vahai javo ijie jage ijioi o amita pere na mamo ta ke hajire ingihe mamo ambo ambo ue tambuta pambuora.

⁴ Eto tambuta puvuto o mamo kiti pahuoi ambota oroviketo ke hajire ingihe pambuora.

⁵ Te embo nei ta ke hajire ingihe amo mane ambo ambo eora te oju toto pambuora.”

⁶ Eto ke ainge Iesu na timu hatirari ke na ena te embomeni na ke be hotembae eo,

O ‘sheep’ simba ari embo be amo Iesu ra

⁷ Iesu na ke ehako einge ena, “Na ungota degi ke be erena, na o ‘sheep’ ta huga pe ra.

⁸ Eto embo nei nei matu kiti puvua amo pegene embopora avoeto o ‘sheep’ na ke hajire ingae ue toa.

⁹ te huga pe amo namo avoeto embo na nau degi ta toreto osaga mane kesuja te puvuto pambuto ue samara eto enena javotoho kito indesuja.

¹⁰ Eto pegene embo amo pegene eto tau amburora puvuja te na puvena amo embo ta vasiri ikano umbuto be isapamane eto irora puvena.

¹¹ Na o ‘sheep’ simba ari embo javotoho ra te o ‘sheep’ simba ari embo amo o ‘sheep’ orekasi amita hamo na ombuto taro sari aisuja.

¹² Rate ‘sheep’ simba ari embo eto ‘sheep’ ta mamo mane avoeto isoro o ‘wolf’ na o ‘sheep’ kambasi puvutuhurou kito embo amo o ‘sheep’ toto oju pahurou o ‘sheep’ amo oju sepuriri eto pambasora.

¹³ Amita be amo koro pure ari embo na o ‘sheep’ hotembae euja te

¹⁴ Namo avo o ‘sheep’ simba ari embo javotohora te nanena nau jekahoka kiona eto ungonna na kiora.

¹⁵ Ainge nombo nau Mama na na kiuja eto nanena nau Mama kiona. Eto nau o ‘sheep’ irora namo avo vasiri te amburesona.

¹⁶ Eto nau o ‘sheep’ nenei mitera amo huga jo ei ta irae rate amite tapa nanena tatapeketo umbuto vahai ta ikasona. Eto enana te tapa nau ke hajire ingihe tatapeketo iriroro na enana ta simba ari embo ainge aisona.

¹⁷ Eto nau vasiri toasona eto ehako umbasona

avo nau Mama na na osa ere ua.

¹⁸ Eto uje nau na nau vasiri toasona amo embo nei na mane egimbeto umbasuja. Eto na sovera umbuto amburesona eto sovera amina au nau vasiri ehako umbasona ari avo ainge ana nau Mama na nau degi ta ke ena,” ke ainge Iesu na enu,

¹⁹ Judea embomeni na tumo ue ke sio sao ijie ke einge ea,

²⁰ embo nei nei na, “Embo emo ahihi sasapura na jo ta torari amita uta sapura oi eria avoeto ungotena amita ke mane ingesora,” ainge iijo

²¹ embo nei uhoho na ke einge ea, “Embo ahihi sapura na jo ta torari amo embo titi tahimbari mane kondaetija te embo emo ke be ra,” ainge ea.

Iesu amunure avo ena

²² Eto huvira iji te da Jerusalem ta otohu ari pondo ta

²³ Iesu na temple jo ta degi javo Solomon ta arara ai ta toreto heto unu

²⁴ Judea embomeni na kito puvuto Iesu joeketo ke einge ea, “Umo Keriso rete mo amunure? Avo ke be na pere ejo. Dago iji koso mana mana ue mitera.” ainge eo.

²⁵ “Na ke amo matu eone ingiova te ungona na ke be ae eova. Eto nanena nau Mama ta javo ta ari neite neite eone amina harikeuja aravora te

²⁶ ungona na ke be ae eova. Amita be amo ungo o ‘sheep’ nau manera.

²⁷ Eto o ‘sheep’ nau be amina ke nau ingihe na ambo ambo uore nanena enana kiona.

²⁸ Eto nau o ‘sheep’ amo maine mane pambuora eto embo nei na mane puvuto ingen iauta

egimbeto umbuora te nanena enana ta degi vasiri daroho ikeona.

²⁹ Eto o ‘sheep’ amo nau Mama na nau ikarira eto nau Mama amo embo tapa nembari avoeto embo nei na nau Mama ta ingeni ta egimbeto umbari inono aera.

³⁰ Nau Mama te namo te amo vahaira.” Ainge enu.

³¹ Judea embomeni na ingito Iesu tasi atara siriketo uhuo

³² Iesu na ke einge ena, “Nau Mama na ari neite neite jajavotoho amo nau degi ta eoi eone kiova te ari emita vahai mo deire etene kito na taisi ere ove?” Ainge enu,

³³ Judea embomeni na ke mine einge ea, “Nango no ari neite neite jajavotoho ere oa avoeto umo taisi ae rate inena umo embo rate God ke erea amo sapura be avo erea amita hamota umo taisi ere ora.” ainge eo,

³⁴ Iesu na ke einge ena, “Eto ungota ke pepeni ta ke kajari amo einge mitia, ‘Ungo amo ke kaiha ari embomeni nombo be ra’ ke ainge amo God na ke umbari embomeni ta degi ena avo ungo eteketo kiaere?

³⁵ Eto God ta ke amo echo mane irae aisuja eto aita amo enana embo ke kaiha ari embomeni nombo be avoeto

³⁶ namo avo God Mamo na enda ta ikenu puvua avoeto nanena, ‘Na God ta Meni ra,’ ainge ene ingito ungona nanena God urumbari ke ereva.

³⁷ Eto nanena nau Mama ta pure avo aetena amo ungona ke be mane aeteva te

³⁸ nanena pure avo ururono ungo na kogue na ke be mane aisova te pure avo kogue ke be ijie na

Mama ta jo ta mitena eto Mama jo nau ta mitia avo kogue hotembevujo.” ainge enu.

³⁹ Judea embomeni na andito umbasi eo Iesu na tiumbeto pambuto

⁴⁰ Umo Jordan ovitiho John na embomeni bapataito ena degi ai pambuto mitinu

⁴¹ embomeni na kito puvuto ke einge ea, “John na ari neite neite einge ae rate embo eremita ke avo ere ijiaetija tapa amo ke be ra.”

⁴² Ke ainge ijie embo isapamane na Iesu ke be ea.

11

Embo Lazarus avo Iesu na enu vasiri te erena

¹ Eto embo javo Lazarus amo da Bethany ai ta amita du kakara heriso Mary te Martha te amiga mitiaetija avo ambure umbuna

² (Eto kakara vahai oil mune te amina Iesu ta utu ta kuteto amita siro tu na tuheneija amo Lazarus ta du ta javo Mary ra.)

³ Eto Lazarus ta du emone heriso amina Iesu ta degi ke einge ikeo pambuna, “Bada, no tunga humbari namei avo ambure ue mitia,” ainge ijie ke ikeo pambunu

⁴ Iesu na ingito ke einge ena. “Eto ambure umbuto mane sari aisuja te embomeni na Mama God ta usasa kito eto Meni ta usasa kiora ere ua.” ainge Iesu na ena.

⁵ Eto Iesu na Martha te amita jao Mary te du Lazarus te avo osa ena

⁶ te Lazarus ambure ari ke ingina te sausau pambae iji heriso mitimite

⁷ amita ambotani ta degi, “Ungote enda Judea ta pambasora,” ainge enu,

⁸ Ambotani na ke eingea, “Ate Poekari Embo, umo Judea embomeni na atara na tasi etere puvea te porere ae ehako egerembao?” ainge eo,

⁹ Iesu na ke mine eingea, “Eto iji bitiuja amo amita jo ta amo 12 hours amina usasa euja amo embo na teto kokain eto mane beora amita be amo iji usasa mitia avoeto,

¹⁰ Rate mume te amo teto kokain eto beora amita be amo usasa irae”, avoeto ke ainge,

¹¹ eto ke nei eingea, “Aravorate ungote pambuto ungotenau namei Lazarus erekvia avo ujaro eraja na.” ainge enu,

¹² ingito eingea, “Bada, amo jangu indie erekvia avoeto kondasuja,” ainge ijie

¹³ teho evo ari ke hotembea te Iesu na matu ambuna aravo evo ari ke ena

¹⁴⁻¹⁵ avo Iesu na kito ke hariketo eingea, “Lazarus ambija te ungona na ke be ava mitena avoeto na tunga javotoho ere ona te ungote Lazarus kesi pambasira,” ainge enu,

¹⁶ Ambotani vahai Thomas eto amita javo nei Didymus na ambotani nei uhoho ta degi ke eingea, “Aravora te ungote Iesu ga tapa pambuto sari aisora,” ainge ena.

Vasiri te erari eto daroho irari amo Iesu ta degi mitia

¹⁷ Eto pambuto Lazarus ambunu use ta ike amo iji tapa 4 irae enu Iesu puvuna.

¹⁸ Eto Lazarus ta da Bethany amo da Jerusalem engiti ta 3 kilometres ainge pambuora

19 Avoeto Judea embomeni na Lazarus ta du kakara Martha te Mary te aingeto Lazarus ambuna avo sipuri asi pambuto mitio

20 Iesu puvurari duru ingito Mary da ta mitinu Martha na Iesu tambasi degi ta pambuto Iesu tambuto

21 Iesu ta degi ke einge ena, “Bada, umo ei ta iraetea amo nau du mane amburaetija

22 te umo do uje eto penunu aisoa amo God na ikasuja avo na ere kogona.” Ke ainge Martha na enu,

23 Iesu na einge ena, “No du amo vasiri te erasuja,” ainge enu

24 Martha na Iesu ta degi einge ena, “Na kogona amo iji kombu te erasuja,” ainge enu,

25 Iesu na einge ena, “Eto vasiri te erari amo namora. Eto embo amuna na ke be aisuja embo amina amburou irae mane aisuja te ehako vasiri te erasuja.

26 Eto embo amuna vasiri te mitie na ke be ijie mane amburesuja te vasiri te daroho iresuja. Ke ainge erena amo umo kogoete?” Ainge enu,

27 Martha na, “Bada, umo God ta Meni Keriso avo simba ere ovora avo enda ta puvea erekira,” ke ainge

Iesu na si ena

28 Eto pambuto amita jao Mary jage eto, “Ate Poekari Embo puvuto umo kesi eria,” ainge enu

29-30 Mary na ingito sau ereto pambuto Iesu da jo ta torae da sahu ta Martha tambuna degi ai mitinu Mary pahunu

31 Judea embomeni Mary ga bande jo ta sipuri ijie mitia amina Mary sau ereto Lazarus ta use ta

si asi pambari ke hotembeto embomeni na Mary ta ambota pahuo,

³² Mary na Iesu ta degi puvuto Iesu kito utu ta beto gombuto ke einge ena, “Bada, umo matu puvuraetea amo nau du mane amburaetija,” ke ainge si te tapa ijinu

³³ Iesu na Mary ta titi sisivu te eto Judea embomeni ta si te avo kito Iesu osaga peni vahai be enu

³⁴ ke einge ena, “Koveteva use naingetare?” ainge enu embomeni na, “Bada, orovira, pambuto ki,” ainge eto pahuo

³⁵ Iesu si ijinu

³⁶ Judea embomeni na kito, “Kivu, osa peni vahai euja avoeto ambei si eria,” ainge iijo

³⁷ embo nei uhoho na ke einge ea, “Embo emina titi tahimbari etei javotoho etija te embo emita amburari emo taekari inono ae avoeto ambei?” ainge embomeni na iijo,

Iesu na enu embo Lazarus vasiri te erena

³⁸ Iesu osaga peni vahai kogue use ta puvuto atara peni amina use pe ahurekea avo kito

³⁹ “Atara evi umbavu pambai,” ainge enu embo ambuna amita du Martha na ke einge ena, “Bada, ambei kovetere iji 4 irae etei sari ue kimu masa ere ua.” Ainge enu,

⁴⁰ Iesu na ke einge ena, “Na no degi ta umo God ke be ijie God ta usasa no degi ta ikau kesoa, ke ainge etenete?” ke ainge enu,

⁴¹ atara umbuo pahunu Iesu na titi i ta eto “Mama umo ke nau ingioa eto ere ingihea avoeto umo osa ere ona.

42 Eto namo avoembo ae rate embomeni ei mitera avo inena na ikae puvua avo ano kito ke be ara erena,” ainge eto

43 hori gagaha eto einge ena, “Lazarus umo tambuto puvura,” ainge enu,

44 amburari embo bo oseseto utu te ingeni te pupundukea eto tombu togea amite tapa tambuto puvuto hetenu Iesu na embomeni ta degi ke einge ena, “Bo togari avo bujeketo tovu pambai,” ainge ena.

*Judea ta embo okokose na Iesu tasi ke kasea
(Matthew 26:1-5, Mark 14:1-2, Luke 22:1-2)*

45 Eto Judea embomeni nenei Mary ga puvua amina Iesu na Lazarus ambunu kovea avo enu vasiri te erena avo kito Iesu ke be ijie tumota ea.

46 Eto Judea embomeni nenei na pambuto Pharisee embomeni ta degi Iesu na ari do ena avo eo,

47 ingito priests pepeni te Pharisee embomeni te aingeto vahaita toruketo ke kaseto einge ea, “Embo emina ari sovera neite neite ere ua emo ungote embo emo do aro?

48 Eto toasora amo embomeni tapa embo avo ke be ijiroro Rome embo na puvuto isoro ue embo torue temple otohu taro irae aisuja.” Ainge ijio

49 juu amita priest peni javo Caiaphas amina ke einge ena, “Ari emo puvija te ungo be kiae ere ova.

50 Rate ungo embo tapa amburesova amo sapurara te ungo embo tapa amita javota embo vahai amburesuja avo javotohora,” Ke ainge Caiaphas na ena.

51 Amo amita hotembari na ae rate Judea ta priest peni ue Iesu na Judea embomeni tapa avoeto amburesuja avo harikena

52 te amo Judea embo avo pere mane rate God ta meniundi enda tapa ta mitera avo namei kamei vhahai ara amburesuja.

53 Eto ke ainge ea iji amikote Iesu naingeto umbuto taro amburesuja avo degi jombure ea.

54 Avoeto Iesu na Judea embomeni ga umoro ae toto amita ambotani ga degi ojagatambu amita engitita da javo Ephraim ai pambuto mitiaetera.

55-56 Eto Judea ta Jarukari Pondo ari iji auvitinu Judea da isisaraho embomeni na Jerusalem ta pambuto enana ta ari ainge avoeto hamo egaro otohu au pondo asi toruketo temple jo ta isa ue ke einge ea, “Ungo do ere hotembeteve? Iesu eha pondo ta puvuroute mane puvurou?” ainge ea.

57 Eto priests pepeni te Pharisee embomeni te aingeto ke matuainge ea, “Embo amuna Iesu kito avo puvuto dago ta evujo dago na embo avo andito umbare,” ainge ea.

12

Iesu ta hamo ta Mary na oil mune te amina kutena

(Matthew 26:6-13, Mark 14:3-9)

1 Eto Jarukari pondo ari ta iji 6 irae ae mitinu Iesu na da Bethany ta puvuto embo Lazarus ambunu enu vasiri te erena

2 Amita bande ta indari indesi pambuo Martha na indari ikenu Iesu te Lazarus te eto umoro embo nenei te aingeto gaga ta arumbeto indie mitio

3 Mary na oil javo ‘Nard’ tigi isapa amita mine amo pajire bera te amina umbuto Iesu ta utu ta

John 12:4

liv

John 12:12

overeketo kuteto amita siro tu na tuhenu bande
jo amo mune na ohugara unu

⁴ Ambotani tapa 12 rate ambotani vahai javo
Judas Iscariot Iesu jenge indesuja embo amina ke
einge ena,

⁵ “Oil mune te emo koro pajire be ombuto koro
umbuto donda ambu embopo ta ikaetera avo
teho aijaja ere ua,”

⁶ ke ainge ena amo donda ambu embopo amo
be hotembae rate ambotani ta koro tapa avo
amina simba aja ke eo koro goru simba ue iji
hekeri ta pegene umbuja avoeto ena.

⁷ Iesu na embo amita degi ke einge ena, “Ara-
vorate to, na amburono kovasora amo oil mune
te emina hamo nau jigesuja avoeto simba ere ua,

⁸ te donda ambu embopo amo iji koso ungote
iresora te na ungote iji koso mane iresona,” ke
ainge Iesu na ena.

Priests pepeni na Lazarus tasi sirikea

⁹ Eto Judea embomeni isapamane Iesu ta duru
ingito kesi pambua amo Iesu pere mane rate
embo Lazarus ambunu Iesu na enu vasiri te
erena amite tapa kesi pambuto

¹⁰⁻¹¹ Lazarus kito Judea ta ari avo toto Iesu ke
be ijio priests pepeni na ke avo ingito Lazarus te
tapa taro amburoja ke ea.

Eto Keriso na da Jerusalem ta pambuna

(Matthew 21:1-11, Mark 11:1-11, Luke 19:28-
40)

¹² Eto iho nei embomeni pondo ta puvua amina
Iesu Jerusalem ta puvutuhunu duru ingito

¹³ Koropa gigi kahumbeto umbuto Iesu tambasi degi ta pahue ke jajage eto eingea, “Hosanna, Israel embo ta ‘king’ Bada ta javota puvuto ere hua. Javotoho ari amita degi iroi.” ainge ijie puvutuhuo

¹⁴ Iesu na o ‘donkey’ meni tambuto umbuto o hamo ta arumbeto pambuna amita ke avo God ta ke matu kajari ai ta eingea mitia,

¹⁵ “Israel embomeni ungo oju avojo ungo ta ‘king’ o ‘donkey’ meni ta hamo ta arumbeto puvuto ere hua.” Ke ainge mitia

¹⁶ amo iji amikote Iesu ta ambotani na hotembae rate Iesu vasiri te ereto Utu usasa ta pahunu amita ambotani na God ta ke matu kajari amite Israel embomeni na pekea amite avo hotembeto ke be ea.

¹⁷ Ainge eto degi ta pahue Lazarus Iesu na jage enu use ta eto erenu kia embomeni amina embo tapa ta degi ke hande eo ingihe degi ta pambua.

¹⁸ Eto hajire avo Iesu na enu embo isapamane na duru ingito Iesu kesi degi ta puvua

¹⁹ Eto Pharisee embomeni na kogue ke eingea, “Kivu, ari emo taekari inono aera te enda embomeni tapa na embo emita ambota ere orovikitera.”

Enda Greek embopo na Iesu jombure ea

²⁰ Eto God jakeka ari embo nenei pondo ta pambua amo enda Greek embopo

²¹ amina pambuto embo Philip amo enda Galilee amita da Bethsaida embo amita degi ke eingea, “Dago Iesu kesi uje ere ora,” ainge eo

²² Philip na pambuto Andrew eto amiga pambuto Iesu ta degi eo ingito

23 Iesu na ke mine eingē ena, “Embo ta Meni na amita Usasa ta torasuja iji puvija erekira,

24 Na ungota degi ke be erena. Eto ‘wheat’ be vahai enda ta beto mane amburesuja amo be vahai aisuja te enda ta beto amburesuja amo be isapamane aisuja.

25 Eto embo amuna enda ta ari amita uje ue iresuja amita vasiri amo beto pambau irae aisuja eto embo nei amuna enda ta ari avo uje ae aisuja amo amita vasiri amo daroho iresuja.

26 Eto embo amuna ke nau agi ue amo na ambo ambo aisuja. Eto na nainge iriona ai ta nau agi ari embo te tapa iresuja. Eto embo amuna ke nau agi aisuja embo amo nau Mama na otohu aisuja.

Iesu amburesuja avo ke ena

27 Rate eha oroho nau jo ta osaga ere kogona te na ke do ano? ‘Mama, nau iji puvija erekira peiketo na hondate e’ ainge anote, ke ainge mane aisona te ari erekira asi puvua avoeto ari emitia iji puvija erekira avoeto

28 Mama, javo no avo ejo peni ai.” ainge ijinu Utu i ta ke eingē puvuna, “Javo nau avo ijione peni ereouva avo ehako ano peni aisuja.” ke ainge puvutuhunu,

29 embomeni areto mitia amina ingito ke eingē ea, “Utu ta tururu eria” ainge ijio embo nei na, “Utu ta anera na ke eria,” ainge eo

30 Iesu na ke eingē ena, “Ke puvuto ere hua amo namo avoembo ae rate ungo avoembo eria.

31 Eto enda ta ari tapa do aingere amo God na matu siriketo hajire ikasi ere ua eto enda ta titi jigari embo amo God na kurumbau pambasuja.

³² Eto namo avo jigoro vivitie embo tapa amo nau degi ta puvuresora,”

³³ ke ainge Iesu na ena amo ate ivo do eto taisora avo harikena. Eto ke ainge Iesu na enu

³⁴ embomeni ai ta mitia amina ingito ke eingea, “Dago Moses na ke kajena avo eteketo kiora amo Keriso puvuresuja amo nangote daroho ire-suja ke avo eteketo kiora te inena Embo ta Meni jigoro bitito amburesuja ainge erea amo Embo ta Meni mo davore?” ainge eo,

³⁵ Iesu na ke mine eingea ena, “Usasa amo ungote iji isapa mitima irae aisuja

³⁶ te usasa mitia emikote ungo isa evujo eto isa ari embo na mume sihukasuja amo sio pambasuja avoeto usasa ungota degi irirou usasa ke be ijie usasa ta meniundi evujo,” ke ainge Iesu na eto embomeni kiae toto pambuto ondikena.

Embomeni na Iesu ke be ae ea

³⁷ Eto Iesu na ari neite neite ena amo Judea embomeni na kia te ke be ae ea

³⁸ amita ke avo Peroveta Isaiah na matu eingekajena, “Bada, dagota ke mo embo amuna ingito ke be erei? Eto God ta sovera neite neite mo embo amuna kito ke be erei?” Ke ainge amo matu kajari mitia.

³⁹ Eto embomeni na ke avo ingito ke be ari haite mane avo God na enu Isaiah na ke eingekajena,

⁴⁰ “Eto embomeni nau degi ta puvuore eone kondesora avo titi ano tahimbau mane kesora eto embo ta jo ano ngahia au mane hotembasora,” ke ainge kajena

⁴¹ amo Isaiah na Iesu ta usasa kogue Iesu avoembo kajena.

42 Eto Judea ta embo pepeni nenei amo Iesu ke be ea amo Pharisee embomeni na katekeore eonga iriona oju ue ondikari na Iesu ke be ea.

43 Amo God na embomeni avo osa aisuja amo hotembae ue embomeni na kito osa ara uje ea.

Iesu ta ke na iji kombute embo pehumba aisuja

44 Eto Iesu na embomeni tapa ingora ke peni vahai be eto einge ena, “Eto embo amuna na ke be euja amo na pere mane rate na ikari Embo amite tapa ke be euja,

45 Eto embo amuna na kiuja amo na ikari Embo amite tapa kiuja

46 Eto na usasa avo puvuto enda ta mitirono embo amuna na ke be ijie mume ta mane iresuja

47 Eto na enda ta pehumba asi puvurae rate enda oreketo umbasi puvena avoeto embo amuna ke nau agi ae aisuja amo nanena mane pehumba aisona te

48 Na uje ae ue ke nau agi ae ere ora embopo amita pehumba ari embo mitia amo ke nau tapa ereketo umbasi puvena avoeto embo amuna ke nau agi ae aisuja amo nanena mane pehumba aisona te

49 Eto ke amita be amo ereketo umbasi puvena avoeto embo amuna ana ijioi eona

50 Eto na kogona amo amita ke ikari ai ta amo vasiri daroho mitia avoeto nau Mama na ke do nau degi ta euja avo pere eona,” ainge Iesu na ena.

13

Iesu na amita ambotani ta utu egena

1 Eto Iesu na enda toto mamo ta degi pambasuja amita iji puvuna amo jarukari pondo asora amita

mume amina Iesu na kina. Eto Iesu na enda ta mitie amita embomeni osa ena amo doaingere avo au kiora ari einge ena.

² Eto Iesu na amita ambotani ga indari indie mitinu Satan na Simon ta meni Judas Iscariot ta degi Iesu harikau umbara enu ingina.

³ Eto God na amita pure tapa Iesu ta ingeni ta iketo tona amite eto Iesu God ta degi eto puvuna avoeto ehako egerembeto pambasuja amite tapa Iesu na kina.

⁴ Eto indio irae enu Iesu na ereto heteto amita bo hamo ta avo houketo hamo tuhari soi umbuto uhu ta tigito

⁵ umo heva ta timbuto overeketo ambotani vahai vahai ta utu egeto soi uhu ta tigina amina tuhitie

⁶ puvuto Simon Peter ta degi puvunu Iesu ta degi ke einge ena, “Bada, umo utu nau egasi ere oe?” ainge enu,

⁷ Iesu na ke mine einge ena, “Na do ere ona ungo eha emo kiae ereova te ambota kesova,” ainge enu,

⁸ Peter na, “Utu nau avo mane egasoa,” ainge enu Iesu na ke mine einge ena, “Eto na utu na egae amo namo te vahaita mane aisoa,” ainge enu,

⁹ Peter na, “Bada aravora, te nau utu pere mane egasoa te ingenitiro te siro te tapa egasoa,” ainge enu,

¹⁰ Iesu na einge ena, “Eto embo na umo kutusuja amo tongopa irae avoeto ehako ando mane egasuja. Eto umo tongopa ambu rate embo nei ei ta amo ainge manera,”

¹¹ ke ainge ena amita be amo jenge indesuja embo amita jo avo Iesu na kogue ke “Embo nei

ei ta amo ainge manera,” ainge ena.

¹² Eto Iesu na ambotani ta utu egenu irae enu amita bo asuketo pambuto gaga ta arumbeto

¹³ ke einge ena, “Eto na ungota degi ate kitira etena emo ungo ere kogovete? Amita be amo erekira, ungona na ungota bada ke eova eto ungota atepoekari embo ke eova amo ke be ra te

¹⁴ Na ungota bada eto atepoekari embo na ungota utu egetena ainge nombo ungo eonga utu mine ega evujo.

¹⁵ Eto ungona kito ainge ava ate kitira etena.

¹⁶ Na ungota degi ke be erena, pure ikari embo amo embo penira eto pure ari embo amo isapara eto nei amo ke ari embo amo embo peni ra eto ke hande ari embo amo embo isapa ra

¹⁷ Eto ari erena avo hotembeto agi ue tunga javotoho te iresova.

¹⁸ Eto na ungo siriketo umbena amita jo amo na ere kogona avoeto ke erena emo ungo tapa ta degi aera. Te God ta ke matu kajari einge mitia, ‘Embo vahai namo te arumbeto ere india amo nau degi ta kitoho ereua,’ kajari ainge mitia avo au inono aisuja,

¹⁹ Eto ari emo puvurae peko ta ene ere ingiheva amita be amo puvurou kito ungona na ke be aisova.

²⁰ Na ungota degi ke be erena, eto embo amuna na ne ikano pambasuja embo avo pekasuja amo namote tapa pekasuja. Eto na pekasuja amo na ikari Embo te tapa pekasuja.”

*Eto Judas na Iesu harikasuja avo ke ena
(Matthew 26:20-25, Mark 14:17-21, Luke 22:21-23)*

²¹ Eto Iesu na ke ainge eto jo ta osaga peni vahai be kito ke einge ena, “Na ungota degi ke be erena, ungo vahai na kitoho embo ta degi harikavo na umbasora,” ainge enu,

²² ambotani na mine kia ue ke eria amita be mo deire ainge iijo

²³ Ambotani vahai Iesu na osa ena embo amo Iesu ta engiti ta sereketo mitina amita degi

²⁴ Simon Peter na ingeni na ate ate ue amunurami erei eto inga ainge ijinu

²⁵ Iesu ta jenge ta siro na tembeto, “Bada, amunure,” ainge enu

²⁶ Iesu na ke einge ena, “Na bread umbuto su heva jo ta kaimbeto ikano indesuja embo re aravora,” ainge eto bread umbuto kaimbeto Simon Iscariot ta meni Judas ta ikenu

²⁷ umbunu Satan na amita jo ta torenu Iesu na Judas ta degi ke einge ena, “Umo do uje ere oe avo sausau pambuto ejo.” ainge enu

²⁸ ambotani nei uhoho na ke be ingae

²⁹ avoeto einge hotembea, Judas amo ambotani ta koro simba ari embo avoeto pambuto pondo asora amita indari umbaja ereite mo donda ambu embopo ta hande ikaja ereite avo hotembitio,

³⁰ Judas na bread umbuto ereto araha mume ta pambuna.

Osa mine ara ari ta ke

³¹ Eto pahunu Iesu na ke einge ena, “Eto iji nau puvija eto God ta usasa na Embo ta Meni joekau embo na God ta usasa kesora

³² eto God na nau usasa ikau usasa ta torasona amita iji ahumpa etija

³³ te oio nau meniundi, na ungote iji koso maneiresona te ke matu Judea embomeni ta etene ingeria avo ungota degi erena ungo na jombure eto amo na pambasona degi ai ungo mane pambasova.

³⁴ Eto na ungota degi ke peni be avo eha ere ikitona amo osa mine ara evujo. Eto na ungo osa eona ainge nombo ungo osa mine ara evujo.

³⁵ Eto ungo na osa mine ara ururovo embo tapa na kito amo Iesu ta ambotanira asora,” ainge enu,

Peter na Iesu kiae ke aisuja avo Iesu na harikena

(Matthew 26:21-35, Mark 14:27-31, Luke 22:31-34)

³⁶ Simon Peter na ke einge ena, “Bada, umo nainge pambao?” ainge enu Iesu na einge ena, “Umo na eha pahurono mane pambasoa te ambotaa pambasoaa,” ainge enu

³⁷ Peter na ke einge ena, “Na do eto umo pambasoaa degi ai ta mane pambana ere? Na umo embo sari asi hotembitena.” ainge enu,

³⁸ Iesu na ke mine einge ena, “Umo na embo sari asi ke ere? Na no degi ta ke be erena, umo iji 3 na kiae ke ijiro ohora javone aisuja,” ainge Iesu na ena.

14

Iesu na ambotani ta degi onde katari ke ena

¹ Eto Iesu na ambotani ta degi ke einge eto ena, “Ungo osaga kiovojo, eto ungo God tumota evujo, eto na tumota evujo

² Eto nau Mama ta bande ta jo kaneke kaneke ari isapamane be mitia te bande jo neite neite ainge irae amo ungota degi ke matu ano ingaeteva. Avoeto na pambuto ungota irari besi siriketo,

³ nununga eto ehako egerembeto puvuto ungo umbuto ungote tapa na iriona degi ai pambuto iresora.

⁴ Eto na pambuona degi amo ungo kiarira.” ainge Iesu na enu,

⁵ Thomas na ke mine einge ena, “Bada umo pambasoa degi amo dago kiaera te no pambari degi amo dago na kiari ke erea,” ainge enu,

⁶ Iesu na ke einge ena, “Eto na amo pambari degi te ke be te vasiri te avoeto embo na na tiumbeto Mama ta degi mane pambuora,

⁷ Eto ungo na na ere kogova amo nau Mama te tapa ere kogova. Eto ungo na iji tapa kiova eto eha oroho emo ere kogova,” ke ainge enu,

⁸ Philip na ke einge ena, “Bada, ejo dago Mama kito inono are,” ainge enu,

⁹ Iesu na ke mine einge ena, “Philip, na ungote iji koso mitovona te inena na kiae ke erea. Eto ungo na ere kogova amo Mama ainge nombo ere kogova rate inena Mama ano be kesi ke ere?

¹⁰ Eto na Mama ta jo ta mitena eto Mama jo nau ta mitia te umo ke be ae ue erete? Eto na ke tapa erena amo na eonga aera te nau Mama jo nau ta mitia amina pure amita avo euja.

¹¹ Eto na Mama ta jo ta Mamo jo nau ta avo kogue ke be evujo. Eto avo ke be ae ue kito sinderi neite neite uore kiova aita na ke be evujo.

¹² Eto na ungota degi ke be erena, eto embo

amuna na ke be aisuja amo nanena eona ainge nombo ari neite neite aisuja. Eto na Mama ta degi pahurono embo amuna na ke be euja embo amina ari na eona amo nembeto aisuja.

¹³ Eto nanena ano Mama ta javo peni aja ungo na javo nau ta penunu aisova amo ikasona.

¹⁴ Eto ungo javo nau ta do uje eto penunu aisova amo ikasona.

¹⁵ Eto ungona na osa ue kito amo ke nau tapa avo agi evujo.

Iesu na Ahihi Otohu ikasi onde ena

¹⁶ Eto na Mama ta degi ano ungota hondate ari embo ikau puvuto ungote daroho iresuja

¹⁷ Amo ke be ari ta Ahihi avo enda embomeni teho kiae na mane umbasora te ungo ta degi puvuto jo ungota ta iresuja avoeto ungo na kesova.

¹⁸ Eto ungo hojo meni toarako mane aisona te na ehako puvuresona.

¹⁹ Amo iji isapa eto enda embomeni na na mane kesora te ungo na na kesova. Eto na vasiri te mitena ainge nombo ungona vasiri te iresova,

²⁰ Eto na Mama ta jo ta eto ungo jo nau ta eto na ungota jo ta avoeto iji puvuresuja amo ungona ari avo kito ke be aisova.

²¹ Eto embo amuna ke nau ingito agi aisuja embo amina na osa aisuja. Eto na osa aisuja embo amo nau Mama na osa ururou nanena embo avo kito osa ue ano na be kesuja,” ainge Iesu na enu,

²² Embo Judas Iscariot mane rate Judas nei amina ke einge ena, “Bada, ke erea amita be mo deire? Eto enda embo tapa mane kiora nango pere ao kiora erete?” Eto ke ainge enu

²³ Iesu na ke mine eingē ena, “Eto embo amuna na osa ue ke nau agi aisuja amo nau Mama na embo avo osa ururou dago na puvuto amita jo ta iresora.

²⁴ Eto embo amuna na osa ae euja amina ke nau agi mane euja. Eto ke amo nau mane rate na ikari Embo ta ke ra.

²⁵ Eto na ungota mitie ke erevi ungota degi erena

²⁶ te ungota hondate ari embo Ahihi Otohu avo nau Mama na nau javo ta ikau puvuto ke tapa do erena amo harikau ungo na ehako hotembasova.

²⁷ Eto ungota degi hande ere ikitona amo nau peka avo ungota degi iketo pambasona. Eto peka amo enda embo na mane ikaetera te nanena ungota degi hande ere ikitona avoeto ungo oju ue osaga neite neite avojo.

²⁸ Eto na pambuto egerembasi ke etene ingeva amo Mama nau amo na aingeko mane embo peni be amita degi ere pahona, avoeto ungo na na osa ue amo tunga javotoho evujo

²⁹ Eto ari erevi puvurae kititau puvurou kito ungo na ke be ava erena.

³⁰ Rate na ungota degi ke koso mane aisona te enda ta titi jigari embo sapura puvuto ere hua amita ivo na na nembari inono aera,

³¹ te na Mama osa ere ona amo enda embo tapa kiora Mama ta uje tapa avo pere inono ta ere ona, te have ungote pambare,” ainge Iesu na ena.

15

Iesu amo esi uhu be ra

¹ Eto Iesu na ke einge ena, “Namo esi uhu be ra eto nau Mama amo pure Mamora

² Eto esi hatu vahai be ae aisuja amo sapura avoeto gisiketo gosukau iraesuja eto hatu nei be euja avo kito kombu poekau be isapamane aisuja

³ Eto ungo nau ke eone ingiova avoeto hatu ta kombu poekari avoeto nau jo ta iresova eto na ungota jo ta iresona.

⁴ Eto hatu na be eonga mane euja te uhu mitia avoeto hatu ta be euja, ainge nombo ungo namote irae amo ungota be mane aisuja

⁵ Eto namo esi uhu ra eto ungo esi hatu ra eto ungo namote iresova eto na ungote iresona amo be isapamane aisuja rate tiukasora amo be mane aisuja

⁶ Eto embo amuna na toto pambasuja amo hatu tiukeore jaise euja ainge au umbuto i ta ikaro evekasuja.

⁷ Eto umo namote mitiro nau ke avo no jo ta irirou umo do uje eto penunu aisoa amo ikano umbasoa.

⁸ Eto ungo na be isapamane ururovo amo embomeni na nau Mama ta usasa javotoho koguroro ungo nau ambotani be aisova.

⁹ Eto nau Mama na na osa euja ainge nombo nanena ungo osa ere ona avoeto ungo nau osa ari ta irivujo

¹⁰ Eto nau Mama ta ke agi ue nau Mama ta osa ari ta iriona ainge nombo ungo ke nau tapa agi aisi uje eto kito osa ari nau ta irivujo.

¹¹ Eto osa ari nau na ungota jo enetau tunga javotoho be ava etene ere ingiheva.

¹² Avo ari vahai erevi ava erena, eto na ungo

osa ere ona ainge nombo ungo na osa mine ara evujo.

¹³ Eto embo na amita namei kamei osa ue oreketo amburesuja amo osa eora amo nemba-suja.

¹⁴ Eto ungo ke nau tapa avo agi ue amo namei kamei nau be aisova

¹⁵ Eto na ungo pure embopo ke ijiena te avo toto ungo nau namei kamei ke aisona amita be amo pure embo na pure mamo ta ari tapa avo mane kiuja rate na Mama ta ari tapa amo kiona avoeto ungota degi eone ingiova avoeto ungo nau namei kamei ra.

¹⁶ Eto ungona na uje ae rate nanena ungo uje eto siriketo uhana amo ungo be ava iketene pahava eto be amo mane sari aisuja te darohoiresuja. Eto ungo na nau javo ta do uje eto penunu aisova amo nau Mama na ikau umbasova.

¹⁷ Eto na ungota degi ke peni be amo ari vahai erekvi ava erena. Ungona osa mine ara evujo.

Enda embomeni ta tumo ari

¹⁸ Eto enda embo na ungo uje ae ururoro kito amo ke erekvi hotembevujo, ari amita kitit a amo na uje ae ere uaetera

¹⁹ Eto ungo enda embo ta toho aeteva amo enda embo na ungo osa aetera te ungo nanena enda ta eto umbua avoeto ungo enda embo mane avoeto enda embo na ungo osa ae eora.

²⁰ Eto ke matu nanena ea avo hotembevujo, eto pure embo amo isapa eto pure mamo amo peni ra. Avoeto nau degi ta memenga ikasora ainge nombo ungota degi ta memenga ikaro keisova.

Eto ke nau agi aisora amo ungota ke te tapa agi aisora.

²¹ Amo na ikari embo avo kiae na vahai kiora avoeto aisora.

²² Eto na puvuto enana ta degi ke avo ae toaetena amo na enana ta degi pehumba mane aetena te na puvuto ke matu ijiena avoeto enana ta ari tapa amo teto haito ari inono aera.

²³ Eto embo amuna na tumo euja amo nau Mama te tapa tumo euja

²⁴ Eto embo nei na puvuto ari neite neite ae kiae rate nanena puvuto ari neite neite etene kera. Eto ainge ae kiae amo enana ta degi pehumba mane aetena te enana ari tapa etene kera te namote nau mama te avo uje ae ere ora.

²⁵ Amita ke avo God ta ke kajari ta einge kajari mitia, ‘Enana ke amita susu irae rate teho sio tumo sosou nau degi ta ere uaetera.’ ke ainge kajari mitia avo eto etera.

²⁶ Eto na Mama ta degi pambuto ungota hondate ari embo ikano puvuresuja amo ke be ari ta Ahihi Mama ta degi puvuja avo puvuto nau harika embo aisuja.

²⁷ Eto ungo te tapa itikari ta namo te tapa mitovova avoeto ungote tapa harika ari embopo nau aisova.”

16

¹ “Eto ungo na tumota ae eova avoeto taekitie erena

² Eto Judea embomeni na ungo katekaro eonga iresova, avo pere mane rate iji puvuto ere hua amo embo na God ta pure otohu asi ke ijie ungo taro amburesova

³ Amo enana na Mama te namo te avo be kiae
avoeto ari ainge aisora

⁴ Amo na ungoete mitovona avoeto ke erevi
matu ungota degi ae ingae rate iji puvurou
hotembava eha erena.”

Ahihi Otohu ta pure ari ta ke.

⁵ “Eto na ikari puvurari embo ta degi pambasi
ere ona te ungo embo vahai na, ‘Umo degi nainge
pambasi ere,’ ke ainge amo nau degi ta eto ingae
ra

⁶ te ke erena avo ungo ingihe tunga osaga ere
kogova

⁷ te ungota degi ke be pere aisona amo ungota
irari javotoho avoembo na ere pahona. Eto na
pambae amo ungota hondate ari embo Ahihi
Otohu na mane puvuresuja te nanena pambuto
ikano ungota degi puvuresuja

⁸ Eto puvuto enda embomeni ta ari sasapura do
aingere avo harikau be kesora. Eto ke be ari embo
javotoho te eto embo ta ari siriketo hajire ikari be
amo do aingere avo Ahihi Otohu na ke pejau be
kesora.

⁹ Eto embomeni amo na kito ke be ae avoeto
embomeni amo ari sasapura embopora.

¹⁰ Eto na ungo toto Mama ta degi pambuto ungo
kiae iresona amo Ahihi Otohu na au kito embo
emo ke be embora ainge embomeni na aisora.

¹¹ Eto enda ta titi jigari embo sapura amita
pehumba matu ingito taekasona avo eto Ahihi
Otohu na au kito embo emo ari sirikari embo be
ra ainge aisora.

¹² Eto na ke neite neite eha aisona te ke ngahia
be ungo ingari haiteko mane

13 Avoeto toano ke be ari ta Ahihi na puvuto ke te ari tapa te avo au ungo na kesova eto amita hotembari ke avo mane au ingesova te God na amita degi ke do enu ingina avo au ingesova amo iji ambota do puvuresuja amita ke te tapa au ingesova

14 Eto ke au ingesova amo kiari nau avo au ingihirovo javo nau avo peni aisuja.

15 Eto kiari nau au ingesova erena amo nau Mama ta kiari te donda tapa te amo nau iketo tona avoeto erena.”

Tunga osaga ari te tunga javotoho ari te amita ke

16 “Eto iji isapa na ungona mane kesova eto iji nei isapa ungo na na kesova” ke ainge Iesu na enu

17 ambotani nei uhoho na ke mine ara eto eingea, “Eto iji isapa na mane kesova eto iji nei isapa na kesova eto na Mama ta degi pambasona ainge eria amita be mo deire?

18 Eto ke nei iji tuhaupa ke ena amita be amo deire?” ainge ijio

19 Iesu na eto ingari ke ere ijia avo Iesu na kito ke eingea, “Eto ‘ungo iji isapa na mane kesova eto iji nei isapa na kesova’, ke ainge etena avoeto ungo ke ungo eonga mine ara ijie ereve?

20 Na ungota degi ke be erena. Enda embomeni na tunga javotoho te ururoro ungona sisivu kuttie sisisasi te ururovo ungota jo aherekau tunga javotoho aisova

21 Eto pamone na meni umbari iji puvuoi memenga koguoi eto meni singa enda ta puvuoi kito tunga javotoho ue memenga jenambueuja

22 ainge nombo ungo osaga ere kogova te na ungo ehako kogurono ungo tunga javotoho be ururou embo nei na ungota tunga javotoho avo mane peikasuja.

23 Eto iji amite ungo na nau degi ta do mane eto ingesova te na ungota degi ke be erena, ungo na do uje eto nau javota penunu aisova amo Mama na ikau umbasova

24 rate unguna itikari ta eto puvuto eha emikote amo nau javo ta unguna penunu ae avoeto penunu eto umbuvujo ungo tunga javotoho be ai.

Iesu amo ari sasapura nembari embora

25 Eto ke erena amo timu hatirari ke na erena te iji puvuresuja amikote amo timu hatirari ke na mane aisona te ke be na pere Mama ta ari mo do aingere avo ano ingesova.

26 Eto iji amikote amo ungo na nau javota penunu aisova te nanena ungo embo Mama ta degi ta penunu aisi ke mane aisona

27 Amita be amo unguna na Mama ta degi puvurari ke ijie na osa ere ovova avoeto Mama na ungo osa ere ua.

28 Na Mama ta degi eto enda ta puvena avoeto ehako enda toto Mama ta degi egerembasi ere ona,” ainge Iesu na enu,

29 amita ambotani na ke einge ea, “Jove, na sesena, eto ke umo erea amo timu hatirari ke na ae rate ke be na pere erea.

30 Eto ari tapa umo kioa avoeto embo ta jo ta hotembari deire amo umo ere kogoa avoeto ke tapa erea te dago oroho be ere kogora amo umo God ta degi puvurari avoeto dago ke be erera,” ainge eo.

³¹ Iesu na ke mine einge ena, “Ungo eha iji tutumota na ke be ereva amo ke ungotara.

³² Te kivu, iji puvija amo matu puvija te ungona na egiketo pusi hanana eto vahai pamba ururovo na eonga mane iresona te nau Mama ga iresona

³³ te ungo nau degi ta peka umbava ke erevi ungota degi erena. Nanena enda ta ari avo isoro eto nembetena avoeto ungo enda ta osaga neite neite kogue joru avojo,” ke ainge Iesu na ena.

17

Iesu na pari ena

¹ Eto Iesu na titi i ta eto pari einge ena, “Mama, nau iji puvija avoeto sovera no avo nau degi ta ikejo usasa ururou embomeni na kiore. Eto, Mama, nanena ano usasa no avo peni ururou embomeni kito javo no avo aro peni ai.

² Eto Mama, inena embomeni tapa avo no Meni ta ingeni ta ika avoeto inena embomeni nau toho ikari amita degi ejo vasiri daroho irari ikane

³ Eto embo na umo eonga God ra ainge ijie inena Iesu Keriso enda ta ikae puvuna ainge ijie vasiri te daroho iresuja.

⁴ Eto inena pure nane ana ika avo etene irae etei no javo enda ta peni etija.

⁵ Eto Mama, na no usasa ta torari iji puvija amo enda ae kiti ta no usasa ta ungote mitiatena avo eto inena javo nau ejo peni ai.

⁶ Eto enda embo inena siriketo umbuto nau ikae nanena etene umo ere kogora. Eto embomeni no nau ika amina ke no agi ere ovora

⁷ Eto eha oroho emite amo nau ke te ari te amo no degi ta eto puvurari avo be ere kogora

⁸ eto amita be amo inena ate poekari no nau degi ta ikari avo enana ta degi hande one ingihe inena na ikae puvua avo enana na ke be erera.

⁹ Eto na embo tapa avoeto pari ae rate embo no nau ika amo embo no avoeto pari ereona.

¹⁰ Eto tapa nau amo toho nora eto tapa no amo toho naura. Eto enana na ore javo nau peni ere ua,

¹¹ Eto na enda ta mane iresona te na no degi ta pahurono enana na enda ta iresora avoeto, Mama Otohu, no javo sinderi te amina enana simba ejo. Eto dago vahai ainge nombo enana vahai are.

¹² Eto na enana ga mitie sovera no nau degi ta ikari amina enana simba one javotoho mitera te no ke matu kajari ta mitia avoeto jenge indari embo na umo toto pambija avoeto hana kesuja.

¹³ Eto na no degi ta pambasona avoeto enda erei mitie enana nau tunga javotoho ari avo umbara no degi ta ke erevi erena

¹⁴ Eto enana amo enda ta toho mane, na iteko, avoeto ke no avo ene ingihera avoeto enda embomeni na tumo ere ora.

¹⁵ Amo na enana enda ta eto umbae penunu aerate engekari embo avo peikitie enana simba ae erena

¹⁶ te na enda ta toho mane ainge nombo enana amo enda ta toho manera,

¹⁷ te no ke amo ke be avoeto no ke be ari na enana ejo otohu are.

¹⁸ Eto na inena enda ta ika ainge nombo nanena enana enda ta ere ikitona

¹⁹ Eto enana ke be ijie otohu ara nanena enana avoembo otohu aisona.

²⁰ Eto na enana avoembo pari ae rate enda

embomeni na enana ta ke ingihe na ke be aisora avoeto pari ere ona.

²¹ Eto enana ejo tunga vahai eto jo vahai are. Eto Mama, na jo no ta mitena eto umo jo nau ta mitea ainge nombo enana ejo ungotenau jo ta iore. Eto ari avo enda embomeni na kito na inena ikari avo hotembitie ke be aisora.

²² Eto ungotena vahai ainge nombo enana vahai ara inena no usasa nau degi ta ika avo nanena enana ta degi iketena.

²³ Amo na enana ta jo ta eto umo jo nau ta ra. Eto inena ejo enana ta jo vahai ari inono au enda embomeni na kogue na inena ikari avo ke be aisora eto inena na osa eoa ainge nombo enana osa eoa avo hotembasora.

²⁴ Mama, embomeni inena nau ikari avo na pambuto iresona degi ai ta pambuto irora uje ere ona. Eto mitie enda irae kiti ta inena na osa ue usasa nau degi ta ika avo kiora uje ere ona.

²⁵ Mama, umo ari javotoho ari embo, avo enda embomeni na umo kiae rate nanena umo kiona eto embomeni nau emina na inena ikae puvua avo ere kogora.

²⁶ Nanena javo no avo enana ta degi hariketene ingeria eto ehako kaiketo ano ingihiroro inena na osa ere oa eto osari avo enana ta jo enetitirou na enana ta jo ta iresona,” ainge Iesu na pari ena.

18

Iesu andito umbua
(Matthew 26:47-56, Mark 14:43-50, Luke 22:47-53)

¹ Eto Iesu na pari enu irae enu ambotani umbuto umo Kidron embuto pambuto degi dagogotambu ai ta torea.

² Eto degi amo Iesu na ambotani ga iji nei nei ainge arora uoi Judas, Iesu jenge indari embo, amina ere koguaetija

³ Avoeto pambuto priests pepeni te Pharisee embomeni te amita isoro ari embopo te eto embo okokose nenei te avo kiti umbuto horivo ijimbeto ki emi jigito degi ai ta pahuo

⁴ Iesu ta degi do ere puvutuhuna amo matu kito Iesu na pambuto isoro embo ta titi ta heteto ke einge ena, “Ungo embo amunurami jombure ere ove?” ainge enu,

⁵ ke mine einge ea, “Dago Iesu, Nazareth embo avo jombure ere ora,” ainge eo, “Namora,” ainge ena. (Eto embo Judas amo Iesu harikasi embo ta orohuta heteto mitina.)

⁶ Eto Iesu na, “Namora,” ainge ijinu, Isoro embomeni na ingito ku na atuna pambuto enda ta bea.

⁷ Eto Iesu na ke ehako, “Ungo amunurami jombure ere ove?” ainge enu enana na ehako, “Nango Iesu Nazareth embo avo jombure ere ora,” ainge eo,

⁸ Iesu na ke einge ena, “Ke matu etene ingeva amo namora te embomeni namoga mitera erevi evu tapa pambare,”

⁹ Ke ainge ena amo Iesu na pari ta ke matu einge ena, “Inena embo nau ika avo vahai beto mane pambasuja,” ainge pari ta ena avoeto embo tapa pambara ena.

¹⁰ Eto Simon Peter amo amita asivo mitina avo

kororoeto umbuto priest peni amita pure embo
javo Malchus ta onde jeto havekenu

¹¹ Iesu na Peter ta degi ke einge ena, “No asivo
goru ta juruke. Na Mama na atungu erevi indona
siriketo ikena amo mane indonote?” ke ainge
Iesu na ena.

Iesu Annas ta jo ta hetena

¹² Eto isoro embopo te eto titi jigari embopo te
embo okokose te na Iesu jigito ingeni punduto

¹³ umbuto pambuto embo javo Annas ta jo ta
ikeo hetena. Eto iji amikote embo Caiaphas amo
priest okose ena eto embo Annas amo Caiaphas
ta imi avoeto Annas ta degi kiti pambuto ikeo
hetena

¹⁴ Eto Caiaphas na Judea embomeni ta degi ke
matu einge ena, “Embo tapa mane amburesora
te embo tapa avoeto embo vahai amburesuja,” ke
ainge Caiaphas na ena.

Peter na Iesu kiae ke ena

(Matthew 26:69-70, Mark 14:66-68, Luke 22:55-
57)

¹⁵ Eto Simon Peter te ambotani nei vahai amite
aingeto Iesu umbuto pahuo ambota pambuto
ambotani vahai amo priest peni na matu kiari
avoeto Iesu ga priest peni amita bande jo ta
torenu Peter avo bande bokiri pe araha ta heteto
mitinu

¹⁶ Ambotani nei vahai priest peni matu kiari
avoeto jo ta torena amina bokiri simba ari pa-
mone amita degi enu puvuto Peter enu jo ta
torenu

¹⁷ bokiri simba ari kakara nei amina einge ena, “Embo emita ambotani nei amo umorete?” ainge enu Peter na, “Na avo manera,” ainge ena.

¹⁸ Eto jajemounu bande pure embopo te bande simba ari embopo te aingeto i buju evikitina ai ta heteto eritie mitio Peter pambuto enana ga heteto i eriritinu

Priest Peni na Iesu ganoka ena

(Matthew 26:59-66, Mark 14:55-64, Luke 22:66-71)

¹⁹ Eto priest peni na Iesu na ke do ate poekitinu ingihe ambo ambo ea avo enu

²⁰ Iesu na ke mine einge ena, “Eto ate poekari nau amo ondikari na ae rate araha tambuta eone embo tapa na ingiora amo ke kasari bande ta eto temple jo ta eto Judea embomeni torukeora amita degi eone ingiora amo ke nei do ondikae

²¹ Avoeto umo nau degi ta eto mane ingesoatena ke do tapa eone ingiora amita degi eto ingijo,” ke ainge Iesu na enu,

²² isoro embo vahai Iesu ta engiti ta heteto mitina amina, “Umo do eto priest okose ta degi ke sapura ere?” ainge ijie Iesu ta tombu ta tenu

²³ Iesu na ke mine einge ena, “Na ke sapura do etene ingea avo ejo ingone. Eto na ke sapura ae rate na sio tetea,” ainge enu,

²⁴ Annas na Iesu ta ingeni pundua amite tapa ikenu priest okose javo Caiaphas amita degi pambuna.

Peter na Iesu kiae ke ehako ena

(Matthew 26:71-75, Mark 14:69-72, Luke 22:58-62)

²⁵ Eto Simon Peter i eritie mitinu embomeni na, “Umo te tapa amita ambotani rete?” ainge eo, Peter na, “Na avo manera,” ainge enu,

²⁶ Priest peni ta pure embo vahai amo Peter na embo onde jeto havekena amita javo vahai amina Peter ta degi ke einge ena, “Na umo te tapa embo amiga dagogo tambu ta kenete?” ainge enu.

²⁷ Peter pero ue, “Na avo manera,” ainge ijinu ohora javone ena.

Iesu na Pilate ta titi ta hetena

(Matthew 27:1-2,11-14, Mark 15:1-5, Luke 23:1-5)

²⁸ Eto ihote Caiaphas ta bande toto Iesu umbuto Rome embo ta koto ari oro ta pambua. Eto jarukari pondo indari iji puvuna avoeto ungo hahara ue ungo Rome ta oro ta torae pambae toa

²⁹ Eto Pilate na araha ta puvuto heteto ke einge ena, “Embo emita sapura deire, avo evujo ingone,” ainge enu,

³⁰ embomeni na, “Embo emina ari sapura ae amo mane no ingeni ta ikaetera,” ainge eo

³¹ Pilate na ke mine einge ena, “Ungota ke pepeni na embo evi ganoka eto ingivu,” ainge enu, Judea embomeni na ke einge ea, “Embo tari amburari amo dagota degi ta taekarira,” ainge ea.

³² (Eto Iesu naingeto taro amburesuja amita ke Iesu na matu harikena. Eto embere einge emina enu Iesu ta ke ga inono ena.)

³³ Eto Pilate na koto oro ta toreto Iesu jage enu puvunu, “Umo Judea embo ta king rete?” ainge enu.

³⁴ Iesu na ke mine einge ena, “Ke umo erea amomo embo nei na etere ingito erete mo no hotembari na erete?” ainge enu,

³⁵ Pilate na ke mine einge ena, “Na Judea embo manera te priests pepeni no eto embomeni no amina umo umbuto nau ingeni ta iketera, amo ari sapura no mo deire?” ainge enu,

³⁶ Iesu na ke mine einge ena, “Na embo titi jigesona te enda ta ari avo mane aisona. Eto na enda ta ‘king’ aetena amo embomeni nau na ereto isoro eto Judea embomeni ta ari emo taekaetera te na ‘king’ ainge manera,” ainge enu,

³⁷ Pilate na, “Aravorate umo king rete,” ainge enu, Iesu na ke einge ena, “En, ke umo erea amo ke be. Na king ra te na avo ana nau aja na ingena. Eto na enda ta puvena amo ke be ano embomeni ingora puvena amo embo ke be ingari haite amina ke nau ingesuja,” ainge enu.

³⁸ Pilate na, “Ke be mo deire,” ainge ijie araha tambuta pambuto Judea embomeni ta degi ke einge ena, “Eto na embo emitia sapura tambae etena

Iesu taro amburoja ke ea
(Matthew 27:15-31, Mark 15:6-20, Luke 23:13-25)

³⁹ Avoeto ungo Judea embo ta jarukari pondo iji te amo tipura embo eone tambuta pambuora avoeto ungo Judea embo ta king erevi ano tambuta pambaute?” ainge enu,

⁴⁰ embo tapa na gagaha eto ke einge ea, “Embo avo mane tambuta pambasuwa te embo Barabbas avo ejo tambuta pambai,” ainge ea te Barabbas amo pegene embora.

19

¹ Eto Pilate na enu Iesu umbuto pambuto esi gamba na ejembeto teo irae enu

² Rome ta isoro embopo na esi pepe te avo umbuto horoveto siro ta asuketo bo pangari ikeo uhu ta evunu

³ puvuto amita degi ke einge ijie urumbea, “Oro, Judea embo ta king,” ainge ijie tombu ta tea.

⁴ Eto Pilate na tambuta puvuto Judea embomeni ta degi ke einge ena, “Kivu, na embo erevi pehumba etena te amita sapura do tambae avoeto ungo na kiova umbuto tambuto puvena,” ainge enu

⁵ Iesu na bo pangari te siro pohu pepete asukena amite tapa araha ta puvuto hetenu Pilate na ke einge ena, “Emboire erekira, kivu,” ainge ijinu

⁶ Judea ta priests pepeni te embo pepeni te na kito, “Cross ta te, Cross ta te,” ainge gagaha eto eo Pilate na, “Na pehumba etena te amita sapura tambae etena avoeto ungo eonga umbuto cross ta tevu,” ainge enu,

⁷ Judea embomeni na, “Dagota ke pepeni mitia amo eingera, ‘Na God ta Meni ra,’ ainge eora amo dago na teore ambuora avoeto taro amburesuja,” ainge eo,

⁸ Pilate na ingito joru peni vahai be ue,

⁹ koto ari oro ta toreto Iesu ta degi ke einge ena, “Umo nainge eto puvurari re?” ainge enu Iesu na ke mine ae enu

¹⁰ Pilate na ke ehako einge ena, “Umo nau degi ta ke mine mane aote? Eto ari nau amo eingera, umo ano cross ta tasora eto ano tambuta

pambaso amo na inonora te umo kiaerate?" ainge enu,

¹¹ Iesu na ke mine einge ena, "Eto God na no degi ta sovera ikae amo nau degi ta ari neite neite mane aetea, te embo na umbuto ingeni no ta iketija embo amita ari sapura amo no ainge mane rate pajire be ra," ainge Iesu na ena.

¹² Eto Pilate na Iesu ta ke avo ingito au tambuto pambaja uje ena te Judea embomeni na hori gagaha ijie ke einge ea, "Embo emina king ke ijie Caesar ere urumbitia avoeto inena embo erekao tambuto pambasuja amo umo Caesar ta toho manera," ainge eo,

¹³ Pilate na ingito Iesu umbuto embo okose arumbeto pehumba ari degi amita javo, 'Atara beukari' ai Iesu enu arumbena (Judea embomeni ta ke na 'Gabbatha' eora)

¹⁴ Eto jarukari pondo evito asora avoeto nununga ari iji 12 o'clock unu ari ainge amo ea. Eto Pilate na Judea embomeni ta degi, "Ungota king re erekira," ainge enu,

¹⁵ mine einge ea, "Umbuto pambu! Umbuto pambu! Cross ta te amburoi!" ainge eo Pilate na, "Na ungota king avo cross ta tana erekete?" ainge enu priests pepeni na einge ea, "Dago ta king nei irae Caesar vahaira," ainge ijie ngahia uo

¹⁶ Pilate na cross ta tara enana ta ingenii ta iketo tona.

*Iesu umbuto cross ta tea
(Matthew 27:32-44, Mark 15:21-32, Luke 23:26-43)*

¹⁷ Eto isoro embopo na Iesu umbuto cross ikeo umbuto da ta eto pambuto degi javo, 'Siro Popo'

amo Judea embo ta ke na ‘Golgotha’ ke eora ai pambuto

¹⁸ Iesu orohuta teto embo nei ingeni anga ta teto embo nei ingeni be ta aingeto cross eonga eonga ta tea

¹⁹ Eto Pilate na ke einge kaeto cross ta tena amo, “Judea embo ta king emo da Nazareth embo Iesu ra.”

²⁰ Eto Pilate na ke kajena amo Judea ke na eto Rome ta ke na eto Greek ke na kajena amo da hoita mane avoeto Judea embomeni isapamane na eteketo kito

²¹ Judea embo ta priests pepeni na Pilate ta degi pambuto ke einge ea, “Inena ‘Judea embo ta king’ kaetea avo toto ‘amina na Judea embo ta king ra ainge ena’ avo kajae etea,” ainge eo,

²² Pilate na ke einge ena, “Nanena kaetena avo iresuja,” ainge ena.

²³ Eto Iesu cross ta teo irae enu isoro embo tapa 4 amina Iesu ta bo asukari avo kateketo vahai vahai umbua eto bo nei vahai jo ta asukari tunga ta eto beto utu ta ari amo ihirae rate jorereto kajari avo ungo eonga ke mine ara eto einge ea.

²⁴ “Ungote mane osesekasora te ituha koso te tuho te jigoro embo amuna ituha koso avo umbasuja amo embo amina bo avo umbasuja,” ke ainge amo matu kajari mitia amo einge ra, “Embo amuna bo nau amo kateketo ituha koso te tuho te jigito goruketo umbasuja embo amina umbasuja,” ainge matu kajari mitia, avoeto inono ta isoro embo na ea.

²⁵ Eto Iesu cross ta teo cross engiti ta amita e te amita e ta jao javo Mary amo embo Clopas ta ae

amite da Magdala pamone Mary te aingeto heteto mitio

²⁶ Iesu na amita e kito amita tunga humbari ambotani vahai amiga mitinu kito e ta degi ke einge ena, “Pamone, no meni erekira,

²⁷ eto embo no aja erekira,” ainge enu ambotani vahai amina ingito Iesu ta e avo umbuto amita bande ta pambuto simba ere uatija.

Iesu ambuna
(Matthew 27:45-56, Mark 15:33-41, Luke 23:44-49)

²⁸ Eto ari tapa do puvuresuja amo irae ere ua erekira ainge Iesu na kito God ta ke matu kajari ta mitia avo au inono aja ke einge ena, “Na umo ujeje ere ua,” ainge enu,

²⁹ enana na ingito wine tigami te ovu jo ta pevitari mitina avo hukaru koru ainge javo ‘hyssop’ amina wine ta jauketo Iesu ta pe ta jigio

³⁰ indito ke einge ena, “Aravora, irae etija,” ainge ijie amita siro joreinge unu hoenge irae enu ambuna.

Iesu ta patita ta ki na kajena

³¹ Eto evito amo Judea embomeni ta jarukari pondo indesora iji amo jangu indari iji nombo avoeto embo 3 amita hamo cross ta toaro iresora avo aravora ae eto Judea embomeni na Pilate ta degi, “Embo utu teto popojeketo umbuto pambarote,” ainge eo,

³² Pilate na amita isoro embomeni ikenu pambuto embo heriso Iesu ga cross ta tea avo teto utu poeketo pambuto embo nei teto utu poeketo pambuto

³³ Iesu kia amo matu ambunu kito utu poekae rate

³⁴ isoro embo vahai na patita ta ki na kajenu sasaga te umo te bena.

³⁵ Eto na titi nau na kia embo amina erena avoeto ke nau amo ke be perera eto ungo tapa na kito ke be ava erena

³⁶ Ari emo God ta ke matu kajari ta mitia avoeto inono ta etija. “Eto amita popo tapa amo nei mane taro poekasuja” ainge kajari mitia

³⁷ eto nei amo “Embo patita ta kajea avo embomeni na kogue iresora.” ke ainge matu kajari mitia.

³⁸ Eto embo Joseph da Arimathaea embo amo Iesu ta ambotani rate Judea embo oju ue ondikari na Iesu ambo ambo ena, embo amina pambuto Pilate ta degi Iesu ta hamo umbasi penunu enu Pilate na aravora ainge enu umbuto pambuna

Iesu kovea

(Matthew 27:57-61, Mark 15:42-47, Luke 23:50-56)

³⁹ Eto embo Nicodemus amo matu mumete Iesu ta degi puvuna amite tapa jeune mune te (javo ‘myrrh’ te ‘Aloes’ te) avo umbuto Iesu ta hamo jigesi puvuna amita bouka ta teka amo 50 kilos ainge avo umbuto puvuna.

⁴⁰ Eto Iesu ta hamo umbuto jeune mune te amiga tapa bo koso vahai ai ta iketo togea amo Judea embomeni ta ari ainge eora avoeto ea

⁴¹ Eto Iesu cross ta teo ambuna amita degi engiti amo i vuji jajavotoho irari degi amita jo ta panga to eha kovea amo embo kovae kitit ikeo serekena

42 eto evito amo Judea embomeni ta pondo
indesora sirika burika ari iji te Iesu umbuto hoi
ta pambari inono ae avoeto asa ta kovea.

20

Iesu ta hamo use jo ta iraera

(Matthew 28:1-8, Mark 16:1-8, Luke 24:1-12)

1 Eto jangu indari iji irae enu iho ungate da Magdala pamone javo Mary na Iesu ta panga use ta pambuto atara na pe ahurekea avo hiriketo pambari kito

2 tutuveto pambuto Simon Peter te eto ambotani nei Iesu na osa ena amita degi ke eingene, “Bada ta hamo amo use ta iraera te umbuto pambuto nainge iketere avo nango kiaera,” ke ainge enu,

3 Peter te ambotani nei amite aingeto use kesi

4 tutuveto pahue ambotani nei amina Peter seniketo tutuveto use ta kiti pambuto

5 panga jo ta anembeto bo ‘linen’ na ari amina hamo togea avo enda ta beto mitinu kina te jo ta toraera,

6 te Simon Peter na ambota puvuto use panga jo ta toreto bo enda ta beto mitina avo kina

7 eto bo nei Iesu ta siro togea amo eonga egoveketo degi nei ta ikeo mitina avo kina.

8 Eto ambotani nei kiti use ta pambuna amite tapa toreto kito ke be ena.

9 (Rate Iesu vasiri te erasuja amita ke God ta ke ta kajari avo amikote amo hotembae ea.)

10 Eto ambotani heriso amo egeremebeto bande ta pambua.

Iesu na da Magdala pamone Mary ta degi puvunu kina

(Matthew 28:9-10, Mark 16:9-11)

¹¹ Eto Mary na use pe araha ta heteto si ijie mitimite use ta anembeto

¹² Anera heriso bo parara asukari amo Iesu ikeo serekena ai ta embo nei siro hena ta arumbena eto embo nei utu hena ta arumbena aingeto mitio kogunu

¹³ anera heriso amina pa amita degi ke eingea, “Pamone umo do eto si ere?” ainge eo pa amina, “Nau Bada umbuto nainge iketere avo na kiae ra,” ke ainge ijie

¹⁴ ahereketo Iesu heteto mitinu kina amo Iesu rate be ijuketo kiae unu

¹⁵ Iesu na amita degi ke eingea ena, “Pa, umo si ijie amunurami jombure ere oe?” ke ainge enu Mary na embo avo i buji simba ari embo ke ijie ke eingea ena, “Embo, inena Iesu ta hamo amo umbuto pambuto nainge iketo kito avo ejo umbane,” ainge enu,

¹⁶ Iesu na, “Mary,” ke ainge enu Mary na ahereketo kon eto kito, “Rabboni,” amo Hebrew ta ke na, “Ate Poekari embo,” avo eto enu,

¹⁷ Iesu na, “Na Mama ta degi pambae avoeto na mane jigesoa, te pambuto nau namei kamei ta degi Mama nau eto enana ta Mama eto God nau eto enana ta God amita degi egerembeto pambasi ere ona avo ejo ingore,” ainge enu,

¹⁸ Mary na egerembeto pambuto Bada kina eto amina ke tapa do enu ingina avo ambotani ta degi enu ingia.

*Iesu na amita ambotani ta degi puvunu kia
(Matthew 28:16-20, Mark 16:14-18, Luke 24:36-49)*

¹⁹ Eto Sunday ture mume unu Iesu ta ambotani na Judea embo okokose oju ue bande bokiri iketo jo ta mitio Iesu na enana ta orohuta irerembeto puvuto, “Peka ungota degi iresuja,” ke ainge eto

²⁰ amita ingenii te patita te avo enu kito enana ta Bada avo kito tunga javotoho ue osa pajire be ea.

²¹ Eto Iesu na, “Peka ungota degi iresuja, eto na Mama na iketei puvena ainge nombo nanena ungo ikano enda tapa ta pambasova,” ainge ijie

²² enana ta hamo ta pe hoenge hukitie ke eingi ena, “Ungota jo ta Ahihi Otohu umbuvujo

²³ Eto ungonia embo ta ari sasapura hotembeto toasova amo God na ainge hotembeto toasuwa, te ungo na embo ta sasapura hotembeto toae asova amo ainge God na mane hotembeto toasuwa.”

Thomas na Iesu kito ke be ena

²⁴ Eto Iesu ta ambotani 12 rate vahai javo Thomas amita javo nei Didimus amo Iesu puvuna amikote amo enana ga irae avo eto

²⁵ ambotani na, “Nango Bada kera,” ainge eo Thomas na, “Na amita ingenii ta ikoko na tetera amita pupuho avo titi na kogue ingenii nau na tame eto patita ta amo tame aisona, te ainge ae amo na ke be mane aisona,” ainge enu

²⁶ huria vahai irae enu Thomas ambotani nei uhoho ga bande jo ta bokiri iketo mitio Iesu enana ta jo ta irerembeto heteto, “Peka ungota degi iresuja,” ainge eto,

²⁷ Thomas ta degi ke einge ena, “Nau ingeni pupuho kogue tame eto no ingeni jujuruketo nau patita tame eto umo ke be ae ere oa avo toto na ke be ejo,” ainge enu,

²⁸ Thomas na, “Umo nau Bada eto nau God ra,” ainge enu,

²⁹ Iesu na ke einge ena, “Umo na kogue ke be erea te embo na na titi na kiae rate na ke be aisuja embo amina tunga javotoho aisuja.”

John na do eto ke kajena amita ke

³⁰ Eto Iesu na God ta sovera avo umbuto ari neite neite enu ambotani na kia amo book emitajo ta amo kajaera,

³¹ te ke erevi ere kaitora amo ungotenau orekari embo God ta Meni be Keriso amo embo nei mane rate Iesu avo ungo kito ke be ava ere kaitora amo ungo Iesu kito ke be ijie vasiri be umbasova.

21

Umo ireremba javo Tiberias amita hora ta Iesu na ambotani ta degi puvunu kia

¹ Eto amita ambota Iesu na umo ireremba javo Tiberias amita hora ta Iesu puvuna ambotani na kia amo eingera,

² Eto Simon Peter te Thomas amita javo nei Didimus amite Galilee enda ta da Cana embo javo Nathanael te Zebedee ta meni heriso amite eto ambotani nei heriso amite aingeto vahaita mitio

³ Simon Peter na, “Na umo o timbasi pambasona,” ainge enu ambotani amiga mitia amina, “Dago umote pambasora,” ainge eto mumete pambua te o umbae uo

⁴ iho bujitinu Iesu na puvuto umo hora ta hetena te embo nei ke ijie uo,

⁵ Iesu na jage eto, “Nau namei kamei ungo o umbevete?” ainge enu, “Dago o umbae ra,”

⁶ ainge eo Iesu na, “Ungota hovoro avo e nga be hena ta ikevujo beau o umbuvujo,” ainge enu ikeo benu o isapamane ombunu jigea te bitari inono ae enu,

⁷ ambotani vahai Iesu na osa ena amina, “Embo emo Bada ra,” ainge Simon Peter ta degi enu, Peter bo ujuketo mitina avo bo umbuto asuketo umo ta eheruva eto bovunu,

⁸ ambotani nei uhoho amo e nga tavitie hovoro o na pevitina avoeto jigito goruketo umbuto hora ta pambua amo degi koso mane ‘100 meters’ ainge ai ta pambua.

⁹ Eto enana hora ta bitito bread te o borari amo i ingotu evikitina amita hamo ta mitinu koguo

¹⁰ Iesu na ke eingē ena, “Ungo umo o umbeva avo heriso umbuto have,” ainge enu,

¹¹ Simon Peter na e nga ta bitito hovoro gorukenu hora ta bitinu o pepeni papeni tapa 153 umbua avo kina eto o isapamane rate hovoro perarae ena.

¹² Eto Iesu na, “Ungo huma iho donda indavu,” ainge ena. Eto ambotani na Iesu amo matu kia te ehako umo amunure ainge eto ingesi uje ea te me enu toa.

¹³ Eto Iesu na i amisa ai ta imite o borari te bread te umbuto ambotani ta ikenu india.

¹⁴ Eto Iesu na ambuto vasiri te ereto ambotani ta degi puvunu kia eto ehako puvunu kia eto ehako puvuna emina nei heriso nei vahai ena.

Iesu na Peter ta degi ke ena

¹⁵ Eto enana indio irae enu Iesu na Peter ta degi ke eingē eto ingina, “Enanana na osa isapa ere ora te inena na osa peni vahai ere oete,” ainge enu, Peter na, “Bada, na umo osa ere ona amo umo kiarira,” ainge enu Iesu na, “Aravora te umo nau o ‘sheep’ meni avo simba ejo,” ke ainge eto ehako eto ingina

¹⁶ “John ta meni Simon, umo na osa ere oe?” ainge enu, Peter na, “Bada na umo osa ere ona amo umo kiarira,” ainge enu Iesu na, “Umo nau o ‘sheep’ simba ejo,” ainge eto

¹⁷ ehako, “John ta meni Simon umo na osa ere oe?” ainge enu ke vahai avo nei heriso nei vahai ainge ena avo Peter na ingito tumo ue ke eingē ena, “Bada, ari te ke te tapa amo umo kiarira avoeto na umo osa ere ona amo umo kiarira,” ainge enu Iesu na amita degi ke eingē ena, “Aravora, umo nau o ‘sheep’ unduju.

¹⁸ Eto na no degi ta ke be erena. Umo meni isapa ta amo uhu ta pupuri umo eonga tigito uje no ue ere pahuauetea te kerembo ue no ingeni jujurukitiro amo embo nei na no pupuri uhu ta tigito umo pambari uje ae asoa degi ai ta umo jigito umbuto pambasora,”

¹⁹ (ke amita be amo Peter na naingeto ahurou God ta degi usasa pambasuja avo Iesu na harikena.) ke ainge eto Iesu na, “Umo na ambo ambo e,” ainge ena.

Ambotani nei amita degi ari do puvuresuja

²⁰ Eto Iesu te Peter te pahumite Peter na overeketo ambotani vahai ambota puvutuhunu

kina amo Iesu na osa ena embo amina pondo tutumota indie mitio Iesu ta mindi ta siro tembeto, “Bada umo embo amuna harikau isoro embo na umbaro.”

²¹ Ainge ena embo avo Peter na kito, “Bada embo emitia degi do puvurou?” ainge enu,

²² Iesu na ke mine einge ena, “Embo amo teho mitirou na pambuto ehako egerembasona te amo osaga no manera te umo na ambo ambo ejo,” ke ainge ena

²³ amo sigeto pambunu ambotani tapa ingito, “Ambotani vahai amo mane sari aisuja,” ainge hotembea te Iesu na Peter ta degi, “Ambotani amo mane sari aisuja,” ke ainge ae ra te, “Teho mitirou puvuresona,” ke ainge ena.

²⁴ Ambotani embo amina ke tapa erevi hande ere umite book eremita jo ta kajena. Eto dago kogora ke amo ke be pere ra.

Ke tutumo

²⁵ Eto Iesu na ari neite neite tapa ere uaetija avo siriketo tapa kajaetera amo books amina enda tapa enete aeteite aetija.

**God Ta Duru Javotoho
The New Testament in the Etija dialect of the
Orokaiva Language of Papua New Guinea
Nupela Testamen long tokples Orokaiva long Niugini**
copyright © 1988 Wycliffe Bible Translators, Inc.

Language: Orokaiva

Dialect: Etija

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

PDF generated using Haiola and XeLaTeX on 18 Apr 2025 from source files dated 31 Aug 2023

e5bce6e8-66a6-5bca-bd93-ff4c103b88af